

四庫全書

史部

欽定四庫全書

浙江通志卷一百七十六

人物

五

儒林中

紹興府

漢

王充

後漢書本傳字仲任上虞人少孤鄉里稱孝到京師受業太學師事扶風班彪好博覽而不守

章句家貧無書常游洛陽市肆閱所賣書一見輒能誦憶遂博通衆流百家之言歸鄉教授仕郡為

功曹以數諫爭不合去充好論說以為俗儒守文多失其真乃閉門潛思著論衡八十五篇二十餘萬言利史董勤辟為從事轉治中自免還家同郡謝夷吾上書薦充才學肅宗特詔公車徵病不行年漸七十造養性書十六篇裁節嗜欲頤神自守永元中卒於家

趙晁

後漢書本傳字長君山陰人少嘗為縣吏奉檄迎督郵恥於廝役遂棄車馬去到捷為資中詣

杜撫受韓詩究竟其術積二十年絕問不還家為發喪制服晁卒業乃歸州召補從事不就舉有道卒於家著吳越春秋詩細歷神淵蔡邕讀詩細而嘆息以為長於論衡邕還京師傳之學者咸誦習焉

三國吳

虞

翻三國吳志本傳字仲翔餘姚人孫策征會稽命為功曹待以交友之禮策好游獵翻諫出為富

春長漢召為御史曹公為司空辟皆不就翻與孔融書并示以所著易注融答書曰聞延陵之禮樂觀吾子之治易乃知東南之美非徒會稽之竹箭也孫權以為騎都尉翻數犯顏諫爭權積怒非一遂徙交州雖處罪放而講學不倦門徒數百人又為老子論語國語訓注皆傳於世年七十卒有十一子第四子況最知名注會稽典錄聳字世龍翻第六子清虛無欲進退以禮入晉除河間相抽引人物務在幽隱孤陋之中疾俗喪祭無度弟曷卒祭以少牢酒飯而已當時族黨並遵行之

闕

澤三國吳志本傳字德潤山陰人家世農夫至澤好學居貧無資常為人傭書以供紙筆所寫既

畢誦讀亦遍追思論講由是顯名孫權稱尊號以澤為尚書赤烏五年拜太子太傅每朝廷大議經

典所疑輒諮訪之以儒學勤勞封都鄉侯注吳錄
虞翻稱澤曰闕生矯傑蓋蜀之揚雄又曰闕子儒
術德行亦今之仲舒也通志列傳澤州里先輩唐
固亦修身積學稱為儒者著有國語公羊穀梁傳
注講授常
數十人

徵崇

嘉泰會稽志字子和隱於會稽治易春秋左氏
傳無善內術本姓李遭亂更姓從學所教不過
數人輒止欲令
其業必有成也

晉

賀循

晉書本傳字彥先山陰人其先慶普漢世傳禮
世所謂慶氏學高祖純漢侍中避安帝父諱改
為賀氏循童髫不羣後為武康令政教大行陸機
疏薦召補太子舍人元帝承制以為軍諮祭酒循

稱疾不堪拜謁賜物一無所受改拜太常行太子太傅太常如故帝以循體德率物有不言之益敦厲倍至命太子親往拜焉太興二年卒贈司空諡曰穆循博覽衆書尤精禮傳雅有知人之鑒拔同郡楊方於卑陋卒成名於世

子隰康帝時官臨海太守

虞喜

晉書本傳字仲寧餘姚人少立操行博學好古元帝初鎮江左上疏薦喜懷帝即位徵拜博士

不就喜邑人賀循為司空先達貴顯每詣喜信宿忘歸自云不能測也永和初有司奏京兆府君當遷祧室征西豫章潁川三府君毀主內外博議不能決朝廷遣就喜諮訪焉其見重如此喜專心經傳兼覽識緯著安天論以難渾蓋又釋毛詩畧注孝經為志林三十篇凡所著述數十萬言行世

謝沉

晉書本傳字行思山陰人少孤事母至孝博學多識明練經史內史何充引為參軍以母老去

職耕耘之暇研精墳籍康帝即位朝議疑七廟迭毀以太學博士徵以質疑滯遷著作郎撰晉書三十餘卷沉先著後漢書百卷及毛詩漢書外傳其學在虞預之右云

楊方

晉書本傳字公同會稽人少好學有異才初為郡鈴下威儀公事之暇輒讀五經諸史諸葛恢

見而竒之時虞喜兄弟以儒學立名雅愛方為之延譽賀循報書曰此子開拔有志意不圖偉才如此乃荒萊之特苗鹵田之善秀也遂稱方於京師王導辟為掾轉東安太守遷司徒叅軍求遠郡欲間居著述補高梁太守在郡積年著五經鈎沉更撰吳越春秋并雜文行世

南北朝

賀瑒

南史本傳字德璉山陰人晉司空循之元孫祖道力善三禮有盛名仕宋為尚書三公郎父損

亦傳家業瑒少聰敏齊時沛國劉嶽深器異之嘗與俱造吳郡張融指瑒謂曰此生將來為儒者宗矣舉明經後為太學博士梁天監初為太常丞召見說禮義武帝異之詔朔望預華林講兼五經博士別詔為皇太子定禮撰五經義武帝方創定禮樂瑒所建議多見施行著禮易老莊講疏數百篇賓禮儀註一百四十五卷瑒於禮尤精館中生徒常數百子華字文明通三禮修孝經論語毛詩左傳為兼太學博士

孔休源

南史本傳字慶緒山陰人曾祖遙之宋尚書水部郎父佩齊通直郎休源十一而孤後就

吳興沈麟士受經畧通大義州舉秀才太尉徐孝嗣省其策深善之謂董仲舒華令思何以尚此梁臺建侍中范雲尚書令沈約虛襟引接處之座右武帝嘗問吏部尚書徐勉求一有學藝解朝儀者

欽定四庫全書

卷一百七十六

勉曰孔休源識見清通詳練故事即日除兼尚書儀曹郎每逮訪前事休源隨機斷決曾無疑滯任昉謂之孔獨誦歷都官尚書中大通二年加金紫光祿大夫卒諡貞子通

虞僧誕

嘉泰會稽志餘姚人為國子助教以左氏講授聽者常數百人時博士崔靈恩先習左傳

服解不為江東所行乃改說杜義每文句嘗申服難杜僧誕最精杜學作申杜難服世並傳焉

賀琛

南史賀瑒傳琛字國寶幼孤伯父瑒授經業一聞便通義理瑒異之曰此兒當以明經致貴家

貧常販粟養母閒則習業尤精三禮彭城到溉聞琛美名命駕相造會學侶滿筵聞上佐忽來莫不傾動琛說經無輟曾不降意溉下車就席便申問難往復從容義理該瞻溉嘆曰通儒碩學復見賀生普通中太尉臨川王宏臨州召補祭酒從事武帝召見文德殿與語悅之謂僕射徐勉曰琛殊有

門業後為通直散騎常侍領尚書左丞凡郊廟諸議多所創定武帝與語常移晷刻省中語曰上殿不下有賀雅琮容止閒雅故時人呼之所撰三禮講疏五經滯義及諸儀注凡百餘篇子翊位巴山太守

孔子祛

南史本傳山陰人少孤貧耕耘樵採嘗懷書自隨遂通經術尤明古文尚書為無國子助

教講尚書四十篇聽者常數百人為西省學士助賀琛撰錄書成累遷中書通事舍人加步兵校尉

梁武帝撰五經講疏及孔子正言專使子祛檢閱羣書以為義証後加通直正員郎卒凡著尚書義

二十卷集註尚書三十卷續朱异集注周易一百卷續何承天集禮論一百五十卷

孔子雲

嘉泰會稽志山陰人師事吳興沈峻吏部郎陸倕言於僕射徐勉以為周官一書羣經源

本學絕不傳惟峻獨精勉於是奏峻兼五經博士子雲實傳峻業官亦至五經博士焉

孔僉

南史本傳山陰人通五經尤明三禮孝經論語講說並數十篇生徒亦數百人三為五經博士

後為海鹽山陰二縣令卒於家子叔元頗涉文學官太學博士

賀德基

陳書鄭灼傳德基字承業世傳禮學祖文發父淹仕梁俱為祠部郎並有名當世德基遊

學京邑積年不歸於禮記稱為精明居以傳授累遷尚書祠部郎雖不至大官而三世儒學時論美其不
隆焉

唐

孔若思

傳詳
介節

康子元

唐書本傳會稽人開元初詔中書令張說舉能治易老莊者集賢直學士侯行果薦子元

得侍讀擢秘書少監俄兼集賢侍講學士元宗將東之泰山說引子元行果商裁封禪儀初高宗之封許敬宗議前祭而燔柴說子元白奏周官樂六變天神降是降神以樂非緣燔也請先祭後燔如貞觀禮便行果議以為祭已而燔神無由降子元議挺不徙說曰康子獨出蒙輪以當一隊耶請決於帝帝詔後燔徙宗正少卿以疾授秘書監致仕卒贈汴州刺史

宗

吳孜

嘉泰會稽志會稽人嘗從安定胡瑗學名馳嘉祐治平間會郡謀建學孜即捨宅為基今學有

祠堂存焉初學成太守張伯玉至以便服坐堂上孜鳴鼓行學規伯玉欣然受其罰

欽定四庫全書

卷一百七十六

石侍旦

於越新編新昌人隱居石溪首創義塾三區以上中下為別身自督教衣廩之所成就多

當代名臣范仲淹聘為嵇山書院山長四方受業者甚衆後以子貴贈刑部尚書成化新昌縣志文彥博呂公著杜衍韓絳皆出其門

張堅

兩浙名賢錄字適道諸暨人家貧篤學以聖賢自任聞胡安定教授湖州負笈徒步往從之旦

夕斫味至忘寢食不期年盡得六經之奧辭歸鄉里從遊甚衆每語諸弟子曰人皆可以為堯舜自信得過則精一之傳在我後以八行舉得官尋改京秩貧不能給吟嘯自若時稱為醇儒

陸佃

宋史本傳字農師山陰人居貧苦學夜無燈映月讀書躡僑從師不遠千里受經於王安石入

京適安石當國首問新政佃曰法非不善但推行不能如初意還為擾民如青苗是也推甲科授蔡

州推官召補國子監直講安石子韶修定說文入見
奎集其門佃待之如常同王子韶修定說文入見
神宗問大喪襲衾佃考禮以對神宗悅用為詳定
郊廟禮文官每有所議神宗輒曰自王鄭以來言
禮未有如佃者加集賢校理崇政殿說書元豐定
官制擢中書舍人給事中哲宗立去安石之黨安
石卒佃率諸生哭而祭之識者嘉其無向背蔽宗
即位召為禮部侍郎拜尚書右丞諂者詆佃名在
黨籍罷為中大夫知亳州數月卒年六十一追復
資政殿學士佃著書二百四十二卷於禮家名數
之說尤精如堦雅禮象
春秋後傳皆傳於世

虞仲琳

舊浙江通志餘姚人從尹焞游焞
稱為志學之士登紹興五年進士

胡宗伋

兩浙名賢錄字浚明餘姚人童時如成人及
長刻意於學元符間試禮部不第歸教授鄉

里學者多從之游性至孝跬步未嘗忘親建炎之亂士人避地明越者多以宗伋為歸依孝宗御極授房州文學調瀏陽丞用薦監嚴州比較務最進一官丐祠監南嶽廟宗伋操行方軌篤於道德性命之旨其交游子弟非是莫取史稱為醇儒

黃開

萬厯紹興府志字必先諸暨人博學好古邃於經術所論著有語孟發揮周易圖說孟子辨志

麟經總論春秋妙旨六經指南諸史決疑暨陽雜俎浣溪文集共二百六十餘卷舉紹興二十四年

進士官
崇安令

湛若

兩浙名賢錄餘姚人博雅以鴻碩稱時舉子各占一經若於六經詞賦無不通解同邑呂次姚

建義學聘為師諸生執經問難辨若懸河汎濫百家諸子然後折衷聖經諸生無不解頤官終太常

士博

唐閱

傳詳
循吏

許瑾

兩浙名賢錄字子瑜元度之後世居剡之東林博極經史嘗從朱子游明於理學鄉先生俞浙

狀其行曰學博而正行峻而和文麗而則君子人也學者從之隨其姿稟皆厭足所欲稱為高山先生宗運既改徵辟不就著春秋經傳十卷

元

韓性

元史本傳字明善紹興人宗忠獻王琦其八世祖也博綜羣籍而於儒先性理之說尤深造其

間域文詞雋偉自成一家言延祐初詔以科舉取士學者多以文法為請性語之曰今之貢舉悉本

朱熹私議為貢舉之文不知朱氏之學可乎四書六經發明無餘蘊顧行何如耳有德者必有言施之場屋直其末事士有一善必延譽不已及辨析是非則毅然不可犯出無與馬僕御所過負者息肩行者避道老叟童穉咸稱之曰韓先生卒年七十有六御史中丞伊琦布哈嘗學於性言法當得諡朝廷賜諡莊節著禮記說四卷書辨疑一卷詩音釋一卷郡志八卷文集十二卷

明

趙謙

儒林錄字撫謙初名古則餘姚人就外傳於崇山寺達旦忘寐受業天台鄭四表之門洪武十

二年徵修正韻別用為中都國子典簿罷歸築考古臺著聲音文字通一百卷六書本義十二卷二十二年謙為瓊山教諭黎人皆知向化稱為海南夫子其著述甚多而為學之要則在造化經綸一

圖謂門人王仲迪曰寡欲以養其心觀止以明其理調息以養其氣讀書以驗其誠聖賢之域不難到矣

黃珏

明一統志餘姚人號菊東研極性理之學洪武間以尚書試有司不利遂絕進取意喜翫邵子

皇極經世書旨趣
淵妙有以自樂

潘府

理學見開錄字孔修上虞人自為諸生讀濂洛書慨然有志聖賢成化丁未進士憲廟賓天敬

皇哭臨二十七日禮官請易服府毅然抗疏勸行通喪剴切數千言有援皇明祖訓沮之者府不聽哀經待罪禮部侍郎倪岳獨贊決之定議注三年不鳴鐘鼓不受朝賀出知長樂有惠政遷南兵部主事陳軍民利病七事孔廟災上內修外攘以謹天戒疏又上救時十要多見採納超拜廣東提學

副使奉母以往考校嚴明士習大振以母老乞歸
嘉靖間致仕卜居南山踰二十年闢南山書院聚
徒講學修正五經四書傳註及周程四子之集凡
二十餘種所著素言士類競傳誦之卒年七十三
特賜祭葬以能翊贊
敬皇之孝出特典云

徐光岳

兩浙名賢錄字壽卿新昌人好學尚氣節不
妄交游少嘗請於父曰兒不能為舉子業取

科第願盡讀天下書使行己無愧古人可乎父許
之日夜研究至忘寢食旣而充然有得從父友陳
獻章莊景遊聞見踐履益到年方壯人目為巨儒
景尤愛重作春風亭以居之其詩文賡唱載景集
中

王守仁

傳詳
名臣

王文轅

明儒學案字司輿號黃舉子山陰人七歲拾遺金生待失者歸之既長習靜隱居勵志力

行陽明與之友稱莫逆陽明將之南贛文轅語其門人曰陽明此行必立事功問其故曰吾觸之不動矣後歿陽明方講良知之學時多訕之者嘆曰安得起王司輿於九原乎兩浙名賢錄著有茹淡稿皇極經世律呂諸書

張元忬

分省人物考字子蓋號陽和其先蜀人徙家山陰父天復官太僕卿元忬好讀書負意氣

會楊忠愍諫死遙為誄詞泣下沾襟太僕奇之嘗讀書至朱子格致篇輒覆卷沉思已聞王文成良知之說遂潛心理學嘉靖戊午舉於鄉戊辰太僕有滇難馳京白狀詔免太僕官庚午游太學明年舉南宮廷對第一授修撰聚徒講求世務人才戶外屢常滿教習內書堂尋管理誥勅直起居館超

為左論德兼侍讀疏白太僕寃狀請以恩及已者
移太僕冠服格不行以此鬱鬱致疾平生有志聖
賢學宗王文成然不空事口耳顛務以實踐為基
初太僕作山陰縣志未成元忤續成之又勅紹興
府志會稽縣志稱一方信史又有不二齋稿志學
錄讀尚書考讀詩考讀史膚評皇明大政記理學
見聞錄謂朱陸同源而末流乃岐之非是手摘考
亭所論著與文成意符者彙集之題曰朱子摘編
以祛世儒之惑

蕭鳴鳳

儒林錄字子難號靜庵山陰人年十七棄舉
子業從陽明遊講明理學窮極指歸而踐履

敦篤不務口耳弘治甲子鄉試第一正德甲戌成
進士授監察御史劾大司馬王瓊挾私妄作都督
江彬賣緣投托申救胡世寧孤忠為國時論偉之
奉命巡山海諸闕邊境疎然士始獲餉復命巡雲

南值疾作疏請歸踰年起提學南京課士先德行
而後文藝士服其教有陳泰山蕭北斗之謠陳謂
前提學陳選也尋按察河南仍董學政時宰喉言
官劾之改廣東提學副使丁內艱歸卒著有靜庵
詩錄文錄教錄
杜詩註行於世

俞子良

兩浙名賢錄字汝誠山陰人領順天鄉薦潛
心聖賢之學力敦古道議論侃侃務砥礪名

檢初教諭藥城諄諄以禮誨人未冠者躬為之冠
有婚喪者為之品式使遵行焉藥人感化婦女亦
呼為俞夫子遷肅寧令治邑事如其家竟以勞瘁
卒著明學錄通禮節要尊親錄藥居司牧二集

許璋

明儒學案字半圭上虞人淳質苦行潛心性命
之學白袍草履扶一衾而出欲訪白沙於嶺南

至楚見白沙之門人李承箕質疑問難語之以靜
坐觀心不至嶺南而返陽明自江右歸越每相訪

萊羹麥飯信宿不厭璋歿陽明題其墓曰處士許璋之墓於天文地理靡不究心正德中嘗指乾象謂陽明曰帝星今在楚矣已而世宗起於興邸

徐愛

名山藏字曰仁守仁妹夫也與蔡希顏朱守中同受業於守仁舉進士為南京郎中與黃宗明

薛祝馬明衡陸澄輩日夕砥礪不懈歸與陸澄課耕雪上舉所聞守仁語哀集之曰傳習錄年三十一卒守仁哭之慟明儒學案愛嘗遊衡山夢老僧撫其背曰子與顏子同德亦與顏子同壽覺而異之

季本

分省人物考山陰人既受學精思力踐毅然以聖賢為可學而至常兢兢磨鍊於事為朋友之

間患學者以自然為宗忘其所有事習於惰偷而自便也曰心之本體原是戒慎恐懼天命靡寧主

宰嘗惺猶之龍也矩則常定潛見飛躍隨所遇而時應是以警惕主變化也彼以自然為宗而不知惕若有同出於虛而卒流於物欲者矣文成存時與書言看經書取其有益於學一涉拘執比擬則反為所縛雖特見妙詣一時不無開發之益而意必之見流注潛伏有反為之障而不自覺者後學成歐文莊亦以習心流注箴之蓋師友切磋入微者如此官監察御史以論禮補外卒門人祠之諡曰明德先生

錢德洪

名山藏字洪甫餘姚人守仁倡道德洪與王畿首師事之推尊發明為獨至守仁在越七

年德洪自歸省外無日不侍左右嘉靖五年德洪與畿同舉進士相謂曰吾斯未信引疾歸卒業於守仁八年殿試方北上聞守仁喪遂輟試與畿迎喪廣信制服哭之搆天真精舍像祀守仁收錄遺

言與答問語曰傳習錄既殿試乞教授蘇州以便養屢遷刑部員外自少至老守其師說周遊四方所至學者迎事而受業焉理學見聞錄別號緒山與龍溪兩人最先及門衆中推為教授師卒年七十九有緒山集語錄等行於世

王畿

分省人物考字汝中山陰人學者稱龍谿先生王文成倡明理學以致良知為宗郡人駭而不

信畿首往受業焉弱冠領鄉薦試禮部不第歸卒業於師門踰年大進丙戌復當會試文成命往不答文成曰我非欲以一第榮子顧吾之學疑信者半能闡明之者無踰於子昌往焉畿曰諾在途自六經四書傳習錄外手無別檢抵都同志爭相辨証大為推服入闈中式同門錢緒山亦在選時大臣都不喜學畿語緒山曰此非吾輩仕時也不就廷試而還師門來學者衆不能徧指授則屬畿與

緒山分教之所興起為多文成至洪都鄒東廓率同門請益文成曰汝中與同志里居究竟此事諸君第往相與質之當有得也明年文成卒於南安方偕緒山赴廷試聞信復返至廣信扶櫬歸越經紀喪事廬於墓心喪三年建天真書院於杭州肖像其中且以館四方之來學者壬辰始赴廷對授南職方主事補南武選會有詆為偽學者於是再疏乞休孳孳以講學為務所至接引無倦色萬厯十六年卒

胡瀚

儒林錄鐸從子字川甫餘姚人年十八從陽明遊授以傳習錄博約說歸而有省日從事於求

心悟心無內外無動靜無寂感皆心也即性也其有內外動靜寂感之不一者皆心之不存焉故也作心箴圖列而為五曰心圖指本體也曰存曰死曰出入曰放心各有箴而功以存心為主以恩貢

就華亭訓導陞崇明教諭歸家三十年
築室今山著有今山集一百卷行世

張元冲

明儒學崇字叔謙號淳峰山陰人嘉靖戊戌
進士授中書舍人改吏科給事中分宜入相

元冲言其心術不正不宜在左右諫世廟元旦不
視朝出為江西叅政累陞右副都御史巡撫江西
回籍卒元冲登文成之門以戒懼為入門而一意
求諸踐履文成嘗曰真切純篤無如叔謙嘗謂學
者曰孔子之道一以貫之孟子之道萬物皆備良
知之說如是而已揭座右曰唯有主則天地萬物
自我而立必無私斯上下四旁咸得其平官江西
關正學書院與東廓念庵聯講會以訂文成之學
又建懷玉書院於廣信迎龍溪緒
山主講席惟恐同學之有出入也

蔡宗充

朱節

明儒學崇字希潤號我齊山陰
人登進士以教授奉母孤介不為常

道所喜輒棄去已而教授莆田移教南康入為南
考功陞四川督學僉事林見素謂希淵中有餘養
故能壁立千仞節字守中號白浦亦山陰人舉進
士官御史以天下為已任文成謂之曰德業外無
事功巡按山東流
賊之亂勤事而卒

范瓘

明儒學案字廷潤號栗齋初師王司與許半圭
後卒業於陽明博考羣經悅然有得家貧不以

關懷曰天下有至寶得而玩之可以忘貧作古詩
二十章叙道統及太極之說兩浙名賢錄山陰人
里中以范聖人呼之有司
立石里中曰范處士里

章穎

舊浙江通志字南洲會稽人肆力於經術為易
名家周應中陶望齡皆出其門紹興府志穎善

飲每講授畢即引大白高談古昔及當世人物嫉
惡嚴然人有片長輒誦不啻口凡游手博塞冶歌

而闢署者必匿避之或悔罪去劉宗周贊曰師道
立而善人多先生早傳謝獨齋易學擁臯比談易
數十年淵源所漸多成名士造就人才之功乃在
世道矣子為漢舉於鄉為邑令有賢聲宗周其外
也孫

周汝登

儒林錄字繼元號海門嵯縣人萬厯丁丑進
士授南工部主事歷官至南京尚寶司卿從

兄周夢秀聞道於龍溪先生汝登依之遂知嚮學
南都講會拈天泉證道一篇相發明許敬庵言無
善無惡不可為宗作九諦以
難之汝登作九解以伸其說

陶望齡

列朝詩集傳字周望會稽人禮部尚書承學
之子萬厯己丑會試第一廷對第三授編修

歷中允諭德終國子祭酒諡文簡周望在詞垣與
同官焦竑黃輝講性命之學悅慈湖陽明龍溪近

溪之書曰慈湖師陸蓋文成所自出餘子則文成之裔也萬歷中年以清新自持者館閣中推為眉云目

劉宗周

會稽縣志字啟東號念臺山陰人萬歷辛丑進士師事許孚遠首致力於存天理遏人慾

除行人司行人以祖焯年邁疏乞終養侍祖疾浹四旬不交睫服除起原官奉命封益藩上宗藩六議以病免歸弟子曰益進講學不輟熹宗即位陞禮曹蒞任九日首劾魏忠賢與客氏朋比亂政忠賢大怒矯旨廷杖葉向高救之未幾陞光祿丞復擢尚寶卿以太僕子告明年陞左通政又疏劾忠賢大逆不法忠賢恨之斥為編氓追奪誥命歸家一意講學靜坐讀書頃見浩然氣象知作聖必由慎獨直揭慎獨為心要崇禎登極詔復原官給還誥命陞京兆尹謁文廟大會師儒示以聖賢為學

之要延三老嗇夫咨地方疾苦發奸吏乾沒置之
法捕勲貴家人豪橫不法及舞文犯禁者按治如
律頒文公四禮俾鄉鄙服習遇中貴梨園什具責
而焚之輦轂一清又上疏撤煤米諸稅發內帑賑
饑民躬自慰勞疏糾周延儒溫體仁傾側事上之
罪下詔切責凡三乞骸始得告居家闡人人可為
聖人之旨以證人名堂辛己起少宰晉右都御史
手定憲綱以示諸御史無何熊開元姜埰之獄起
宗周入朝昌言其事聲徹殿陛上震怒奪官歸郡
之天樂鄉麻溪水通江潮為患捐貲築茅山閘與
三江閘為表裏甲申閩賊陷都城宗周聞之慟哭
曰此吾致命時也遂投河中舟人掖之而起自此
絕粒者二十日勺水不入口者十有三日卒所著
有讀易圖說易衍古易抄証學雜解儀禮經傳考
次古學經古小學通紀古小學集記聖學宗要合
璧聯珠道統錄陽明傳信錄方正學錄選人譜人

譜雜記金鑑錄保民訓要鄉約小相編憲綱規條
大學叅疑鄉賢考文集年譜皆原本性命闡明聖
學有闕世道人心子汧字伯繩父殉節治喪畢居
剡溪之秀峰終身茹荼服素編輯遺書寒暑不徹
鄉黨咸稱之

陶奭齡

會稽縣志字君奭號石梁與兄望齡自相師
友學者稱二陶萬歷癸卯舉於鄉授吳寧學

傳遷肇慶推官遂不起與劉宗周講學陽明祠曰
證人會宗周赴召奭齡致書曰願先生安其身而
後動易其心而後語俾天下實受其福若矜名節
如雕鶚橫秋此小臣之所為非大臣事也將歿之
夕猶講衛風一章端然而逝所
著有遷改格喃喃錄行于世

國朝

黃宗義

鄉賢留祀冊字太沖餘姚人父尊素明御史死詔獄宗義年十九袖疏入京訟冤歸而受

業劉宗周聞誠意慎獨之學寧波績學之士數十人連袂稱弟子康熙十八年都御史徐元文薦於

朝

以老病辭乃

詔取所著書宣付史館二十九年

上

以海內遺獻問尚書徐乾學舉宗義但言其衰老乃

止宗義上下古今穿穴羣言自天官地志九流百

氏之教無不精研學者稱爲

梨洲先生年八十有六卒

台州府

宗

蔣至

赤城志臨海人字造之有素行家居講授甚盛母張氏年八十抄經典助之大中祥符六年詔

舉德行遺逸部使者以名聞詔索所著經解以進授將仕郎本府助教賜其母帛孫師顏師閔四世孫鶚見乾道五年科名

徐中行

徐庭筠

宋史本傳臨海人聞安定胡瑗講明道學將往從焉至京師范純仁

薦於司馬光光謂斯人神清氣和可與進道得瑗所授經熟讀精思夜不安枕者逾年乃歸葺小室竟日危坐所造詣人莫測也晚年教授學者自灑掃應對格物致知達於治國平天下不失其性不越其序而後已崇寧中郡守李諤以八行薦去之黃巖陳瓘謫台州聞名納交暨其沒謂與山陽徐積齊名呼為八行先生子三人庭筠其季也童外有志行事父兄孝友天至旣免喪猶不忍娶者十餘年秦檜當國試題問中興歌頌庭筠嘆曰今日豈歌頌時耶疏其未足為中興者五見者尤之庭

筠曰吾欲不妄語而敢欺君乎有詔舉人嘗五上
春官者予岳祠所親咸勸之庭筠曰吾嘗草封事
謂岳祠冗祿無用既心非之可躬蹈耶其學以誠
敬為主起居無惰容不事緣飾不苟臧否一日巾
車歷訪舊遊歸感微疾端坐而逝年八十有五淳
熙間朱熹行部拜墓下題詩有道學傳千古東甌
說二徐之句且大書表之曰有宋高士二徐先生
之墓庭筠之兄庭槐庭蘭皆有父風台學源流庭
筠字季節詠竹詩云未出土時先有節便凌雲去
也無心風致可想見也門人尊之曰溫節先生
謹按台學源流二徐先生外尚有陳貽範字伯模
臨海人羅適字正之寧海人四先生俱傳安定之
者學

石塾

台學源流字子重其先新昌人大父公孺始遷
臨海塾自少警悟不羣及長刻意為學與晦庵

朱子交好嘗稱其論仁之體要甚當願與長者各盡力於斯又謂心說甚善但更須收斂造約為佳以紹興十五年進士歷四縣知南康軍卒年五十有五晦庵誌其墓晚名其燕居之室曰克齋讀書其間沒身不懈後生執業就正者多賴以知嚮方陳者卿修郡乘謂里人自克齋知有洛學車若水亦云克齋石公所謂大人為己之學深造而自得者也所集周易大學中庸解數十卷文集十卷傳學者

徐大受

赤城新志天台人淳熙十一年特科台學源派字季可早歲工詩而志不在詩晦翁行部

聞其賢特訪其廬方與學者講三月不違仁云即杜詩所謂一片花飛減却春耳晦翁擊節遂定交焉家甚貧一夕晦翁至出蔥湯麥飯相對甚歡至今故老猶傳其事著經解文集藏於家邑東南有

竹溪書院
別號竹溪

林鼎

林鼎

台學源流鼎字伯和黃巖人刻意為學博求師友得晦庵以書請教晦庵稱伯

和求道懇切而勉以三言以整齊嚴肅言持敬以先語孟考諸說切己深思言講學以充善端去邪志言省察乾道八年舉進士為奉化簿改定海丞郡令受租輸縱民自槩量吏不得為奸知候官縣民服教無訟上官欲中以罪訪之民間聞頌聲而止通判筠州未行卒弟鼎字叔和嘗與鼎及趙師淵杜畢昆弟受業晦翁之門及別請一言為終身歸宿之地晦翁曰若根本上欠工夫終無歸宿處凜然有省年七十一卒鄉人尊之曰草廬先生表其所居之里曰景賢

趙師却

赤城志紹熙元年宗室科進士居臨海縣字共父終嘉興府判官朱子與呂子約書云台

州有一師邦在此儘
知用力不易得也

趙師淵

赤城新志字幾道號訥齋黃巖人乾道八年進士嘗從朱文公游與之論校綱目前後凡

八書歷官衢南劍寧海軍推官趙丞相汝愚以從班薦有旨與職事官會趙以讒斥遂翩然東歸益究所學積十餘年不仕暨詔申前命以母病添差通判温州入主將作太常簿司農太常丞以論成肅后山陵事不合而去台學源流金華王魯齋嘗跋晦翁所與訥齋帖稱訥齋登朱子之門為最先其後遠庵昆弟相繼而進開之以道誼締之以婚姻往來尺牘其多可知

謹按遠庵名師夏與兄師淵同登朱子之門又趙然道名師雍弟詠道名師箴則往來朱陸二公之間者

林恪

台學源流字叔恭臨海人從晦菴遊晦庵云為學只要致誠耐久無有不得又記晦庵自言所

用力處甚約只就一兩句上用意玩味胸中自是灑落此皆進修真切得力語晦庵之所以教與恪

之所以學蓋莫要於此云

杜晁

杜知仁

台學源流晁字良仲黃巖人嘉定元年進士官終東陽縣初與弟知仁

學於克齋石先生塾克齋致晁於紫陽於是師事者十餘年紫陽嘗謂其論敬字工夫甚善論氣稟有偏而理之統體未嘗有異亦為得之從孫則卿哀集成書名之曰南湖先生文集知仁字仁仲號方山少有俊才為舉子文操筆即驚人刻意於詩不奇不已曰是不足以為學於是即六經語孟考論一時諸先生風旨至紫陽之書則拱而曰道在是矣窮理求仁吾知所止所著詩文十五卷訂禮

讀易說詩多所論
述未及衰次而歿

杜範

傳詳
名臣

池從周

台學源流字子文黃巖人嘉定七年特科嘗
遊晦庵朱子之門屢以書請益晦庵稱其嗜

學而勉以充拓之功又同邑杜貫道亦從朱子遊
稱其所陳諸說皆善但不已其功久之見處漸分
也明

潘時舉

台學源流字子善臨海人從晦庵遊有聞必
記其辨析六經疑義及問學大端多為師門

所稱許平居喜靜坐晦庵云專務靜坐又恐墮落
那一邊去只是虛著此心隨動隨靜無時無處不
致其戒謹恐懼之力則自然主宰分明義理昭著
矣時舉服膺師語造詣日深故其論求放心有云

欽定四庫全書

卷一百七十六

日來覺得此理真無內外面上有跬步不合道理便覺此心已放嘉定十五年以上舍釋褐終無為

軍教授

吳梅卿

台學源流字清叔仙居人嘉定十七年特科仕至忠州文學嘗因果齋李方子獲登朱子

之門講授甚切所著有經說語錄

丘漸

赤城新志字子木黃巖人講明道學為後進所宗與清獻杜公為布衣交鄉人尊之曰木居先

生著有四書衍義

陳耆卿

赤城新志字壽老臨海人嘉定七年進士官至國子司業博學能文遠叅洙泗近探伊洛

周旋子賈馬韓歐之間葉水心序其所作以為學游揚而文張晁也著有論孟紀蒙篋窻集

王賁

兩浙名賢錄字蘊文天台人介特有守鄉俗化之不敢為非王實翁創上蔡書院金華王魯齋

為堂長賁具古冠服來謁及魯齋歸乃敦請代理其事既卒無以斂門人爭經理其喪至於葬道有兩歧一大而遠一狹而近門人請於其婦婦曰先夫平日不曾由徑取捷不可違其志聞者嘆息曰有是夫宜有是婦台學源流賁嘗撰心圖為說以傳學者蓋借一字以立義足為心學之助云

戴良齊

赤城新志字彥肅黃巖人嘉熙進士累官秘書少監以古文鳴而尤精性理之學所著有

中說辨妄通鑑前紀曾子遺書論語外書孔子年譜世譜七十子說林公輔答徐始豐書有曰當今經書雖皆具完而禮經獨為殘缺加以漢儒之記有不純者郡先哲戴大監嘗力為之辨草廬吳文正公師之得其說於今未大行也觀此其學之源委可見

車若水

明一統志黃巖人師事金華王柏講明性理傳學工古文自號玉峯山民所著有宇宙畧

記玉峯冗藁台學源流若水初從陳貧窻學古文及從清獻杜公游大悔之往來玉魯齋之門得聞晦翁緒論嘗欲取大學知止有定以下二條合聽訟章為格物致知傳質於魯齋以為洞照千古錯簡使朱子聞之亦當為之莞爾一笑其友胡立方稱玉峯貌癯而野口呐不能言即之既熟回視胸中狹者寬塞者通陋者廣真益友也

陳天瑞

台學源流字德修號古堂臨海人咸淳元年進士明一統志天瑞公輔之後師事金華王

柏明性理之學志潔行廉為金華令有能名宋末隱遁林壑劾淵明書甲子文集五十卷

戴亨

嘉靖浙江通志字子元臨海人師事邱木居有太極圖說人心道心說近思錄補注朱子詩解

北溪字義辨正其教人以毋自欺為第一義嘗銘座右曰莫見乎隱莫顯乎微欲人不知莫若弗為

楊明復

嘉靖浙江通志字復翁臨海人操履純正博通經籍著有周易會粹尚書暢旨詩學發微

冠昏喪祭圖人稱浦城先生台學源流景定間王守華甫聘為郡學正

董楷

台學源流字正翁御史亨復之子嘗從潛室陳器之得晦翁再傳之學寶祐四年舉進士明一

統志楷臨海人為績溪簿直冤獄賑飢饉修城捍水遷知洪州有惠政官至吏部郎中有克齋集程

朱易行世

周敬孫

嘉靖浙江通志臨海人太學生師事金華王柏受性理之學嘗著易象占尚書補遺春秋

類例

欽定四庫全書

卷一百七十六

元

周仁榮

元史本傳字本心臨海人父敬孫宗太學生初王柏以朱熹之學主台之上蔡書院敬孫

與同郡楊珣陳天瑞師事之受性理之旨仁榮承其家學又師珣天瑞治易禮春秋而工為文章用

薦署美化書院山長舉行鄉飲酒禮士俗為變後辟江浙行省掾史省臣皆呼先生不以吏遇之後

拜集賢待制奉旨代祠嶽瀆至會稽以疾卒年六十有一其所教弟子多名人而台谿布哈為進士第

一第仔肩字本道以春秋登延祐五年進士第終惠州路總管府判官

孟夢恂

元史周仁榮傳夢恂字長文黃巖人與仁榮同師事楊珣陳天瑞夢恂講解經旨體認精

切務見行事四方從遊者皆服焉部使者薦其行義署本郡學錄至正十三年以設策禦寇有功授

登仕郎常州路宜興州判官未受命而卒年七十
四賜諡曰康靖先生著有性理本旨四書辨疑漢

唐會要七政疑解及
筆海雜錄五十卷

盛象翁

赤城新志字景則黃巖人歷平陽汀州路教
授以昌國州判官致仕嘗遊車玉峯黃壽雲

二先生之門學者尊之曰聖泉先生台州府
志著有易學直指本原聖泉文集若干卷

翁森

嘉靖浙江通志字秀卿仙居人隱居教授取朱
子白鹿洞學規以為訓從游者前後至八百餘

人有一歌
稿行於世

周潤祖

赤城新志字彥德臨海人嘗學於周仁榮與
達無善為友隱居教授四十餘年至正中被

召既沒而思命始下鄉人即其所居尊
稱之曰紫巖先生著有紫巖稿十餘卷

陳紹大

兩浙名賢錄字成甫黃巖人以儒學名家元初學者為文競循聲律紹大獨以性理之學

自任為文章必傳經義治尚書作四書辨疑生徒至二百餘人並稱之曰西山夫子

明

徐森

台州府志字宗茂黃巖人六經百家靡不淹貫嘗篝燈讀漢書爐落藝其牛默誦填之不誤一

字尤深於易與兄宗實俱從史伯璿游史奇其才曰昔所謂東甌二徐者今復見之遂呼為後二徐洪武間以薦歷徐開教諭著易說及詩書禮記經義四書辨疑授學者諸藩重臣交聘主文衡劉三

吾薦入侍講經筵卒

郭檟

儒林錄字德茂自仙居徙黃巖之松山里少勤問學壯有所悟由伊洛上溯洙泗求聖賢用心

燕居獨處衣冠修整與人接和氣滿容士多從之
遊其為教謂必先收放心方見得吾道端倪即聖
賢言語皆有歸著又曰學者慙忿窒欲是大切要
處父歿會兵荒不克葬茹蔬抱戚迄葬已始御酒
肉母疾衣不解帶親為沃面浣衣滌席六閱月不
以人代與其兄友愛尤篤卒年六十二門人私謚
曰貞成先生嘉靖浙江通志終元之世隱居教授
洪武初用御史李時可薦始就饒陽知縣三年邑
大治以從兄故坐免遲者察諸途搜篋中唯所著
易說雜評暢庵稿數十卷帝嘉其廉賜紗幘銀帶
寶鈔旌之

朱右

儒林錄字序賢寧海人嘗遊李五峯陳兩峯之
門讀書有覺錄其尤要而切近者名曰性理本

原首揭河圖洛書次叙太極圖說定性書西東二
銘後附通書感興詩而自叙其首洪武三年詔徵

天下名儒至京考禮右與其選比至兼
預修元史大明日歷二書終晉府長史

方孝孺

傳詳忠臣

許繼

分省人物考字士修臨海人自兒時屹有成人
之志以古賢括自勉玩心天人窮蹟探微將大

究六經之緒反之於約以成身致用有得乎心沛
然自樂不以貧賤患難惑其志與方孝孺友善相
切磋不急甫壯而病病三年孝孺每見之未嘗不
覺其獨進也比卒神志不亂洞然於晝夜生死之
故云

陳璣

嘉靖浙江通志字廷嘉臨海人永樂九年進士
改庶吉士授編修奉命纂修五經四書性理大

全書成以疾乞歸十餘年足跡不入公府起廣西
按察僉事提學日與諸生講學以見諸踐履為先

士皆振起甫三載乞休有梅浦田數頃減租以舒
農力陳員韜與子選林一鶚皆出其門年八十二
卒

謝鐸

續文獻通考字鳴治太平人天順甲戌進士選
庶吉士授編修成化中預修英廟實錄校通鑑

綱目上疏言宗神宗好通鑑理宗好綱目而不能
推之政治因勸上親賢講學大本立而萬目自隨
上嘉納之進侍講以難去孝宗起修憲廟實錄弘
治中為兩京祭酒以道義廉節為教疏正文廟祀
典皆師古義不徇俗以希世正德初權奄用事致
仕卒贈尚書諡文肅著有真西山讀書記伊洛淵
源續錄赤城志又刻方遜志文集傳於世分省
人物考號方石卒於正德五年年七十有六

陳選

分省人物考字士賢臨海人天順庚辰進士拜
御史成化初上疏言君子小人進退治道所係

不可不慎救羅倫勅學士倪謙錢溥千進又勅尚書馬昂諸大臣不職出巡江西風紀大振督學南畿規約簡明力變浮華令諸生讀小學書暇則服習古禮遷河南按察使時中官汪直往河南勾當公事選密疏其專擅罪擢廣東布政使廣民疲困為除徭役罷和買有提督市舶司者倚進貢為奸利役戶苦於供需特減去三十人其後番人與海商私通詭稱蘇門答剌國使臣市舶利其貨不問選特發其偽中官深怨乃誣奏他事逮赴京廣人數萬擁留之行至南昌病卒追贈光祿卿諡恭愍選立志以聖賢自期遇格言即手錄於冊平生言不出口視所當為者勇為之不顧利害言動端莊燕會惟服先人故衣客至瓦器蔬食而已嘗曰居此官必盡此職行此事必盡此心所註小學孝經冠祭禮儀等書行於世

金賁亨

分省人物考字汝白臨海人弘治進士歷官福建江西提學副使為人清粹醇夷剛介端

毅既知學問大指毅然以聖人為必可學嘗愛橫渠一時放下則一時德性有懈初學當以心為嚴師及伊川整齊嚴肅則心便一之語言動有紀細過必錄踐履既篤德性堅定及留曹謁告屏居數月默坐澄心一意涵養於明道所謂不須防檢不須窮索延平所謂灑然永解凍釋處超然有得以是居官行政大抵主於崇禮敦敦俗尚端蒙養以維世善俗在閩發明朱子之學本之延平豫章龜山明道具有本末端緒乃開道南書院以崇祀五先生在江右優選志行之士聚之白鹿書院親與講論明濂溪過化之由究鵲湖異同之旨居家百行純備為後學宗仰有學易記道南錄學庸議臨海縣志行世享年八十有六儒林錄賁亨自號其居曰一所學者稱一所先生著台學源流及詩文

集子立愛立敬
立相俱成進士

黃綰

分省人物考字宗賢太平人以蔭補後軍都督府都事王文成自廬陵入覲來見語學文成喜

曰此學久絕君何所聞曰雖粗有志實未有聞文成曰人惟患無志何患無聞訂與終身共學綰聆其言如渴得飲無弗入也後二十年開致良知之旨大歎服執贄稱門人隔林錄明倫大典成陞詹事出為南禮部右侍郎轉左陽明既沒桂萼齟齬之綰上疏言昔議大禮臣與萼合臣遂直友以忠君今萼毀臣師臣不敢阿友以背師遂以女妻陽明之子正億攜之金陵銷其外侮年七十五卒

王宗沐

傳詳名臣

金華府

南北朝

婁幼瑜

金華賢達傳字季玉義烏人聚徒教授不應徵辟著禮記据拾三十卷禮記撫遺一卷文

集六十卷

龔孟舒

南史顧越傳東陽龔孟舒者通毛詩善談名理仕梁位潯陽郡丞元帝在江州遇之甚重

躬師事焉天嘉中位大中大夫

宋

于房

兩浙名賢錄浦江人父嵩有學行房為文有父風而精簡過之遠邇學者視為典型嘉祐四年

進士官至尚書屯田員外郎通判應天府南京留守司子世封正封亦舉進士世封晚著易詩書四

十卷正封著春秋三傳是非二十卷當時稱以經學世其家者必曰浦江二封

王固

金華賢達傳義烏人受業胡瑗登皇祐五年進士初名問臚唱之日仁宗賜以今名因字天貺

官恩陽令有治績

朱臨

浦陽人物記其先家吳興五季避亂遷浦陽臨少穎悟從胡瑗受春秋瑗嘗著春秋辨要唯臨

得之為精晚年好唐陸淳學謂孔子歿千有餘年說春秋者無出淳書之右以呂公著薦入官歷宣德郎守光祿寺丞以著作佐郎致仕著春秋說二百餘篇

杜汝霖

金華賢達傳字仁翁蘭溪人從胡瑗學至曾孫旗伯高旃仲高旃叔高旃季高旃幼高人

稱金華五高旗登呂祖謙門旃問道朱熹淳熙間旗兩以賢良方正薦未赴端平中入館閣五人皆

有詩文
行於世

唐仲友

婺書字與政金華人登紹興進士中宏詞科判建康府上書曰兵力眩於虛數一患也敵

情惑於間言二患也財力屈而妄費三患也官爵濫而輕與四患也和之與戰皆隨時應敵之方而非吾之至計要在不忘宗社之仇先定立國之本時至則起而收之耳執政以為通達國體再知台州為高文虎所排予祠歸著有六經解九經發顯經史難答孝經解愚書諸史精義帝王經世圖譜天文地理辨宣公奏議解說齊文集傳世金華賢達傳說齊其號也兄仲溫仲義皆紹興進士

范浚

正德蘭谿縣志字茂明居香溪家世業儒不嗜榮利紹興間嘗舉賢良以秦檜當國不起閉門

篤志求道學者稱香溪先生有文集
二十四卷行於世朱熹錄其心箴云

呂祖謙

歷代名儒傳字伯恭尚書右丞好問之孫自其祖始居婺州祖謙之學本諸家庭有中原

文獻之傳長從林之奇汪應辰胡憲游又友朱子及張栻講索益精舉進士復中博學宏詞科除太學博士兼國史院編修官實錄院檢討官輪對首勉孝宗留意理學且言恢復大事召試館職嘗喜陸九淵之文而未識其人考試禮部得一卷曰此必江西小陸文也揭示果然人服其精鑒實錄成進對言治道體統願虛心以求天下之士執要以總萬事之幾今日固當激厲其事功尤當愛護其根本遷著作佐郎尋兼禮部以末疾丐祠建麗澤書院以會友講學病中猶為日記察物內省不以一日解除直秘閣卒年四十五諡曰成祖謙學以闢洛為宗嘗言靜多於動踐履多於發用涵養多於講說讀經多於讀史工夫然後可久可大少卞急一日誦論語至躬自厚而薄責於人一時意氣

皆平朱子每稱學如伯恭方是能變化氣質所講
畫將以開物成務居家之政皆可為後世法嘗欲
編近思錄因與朱子同止寒泉精舍分類抉微一
月而成又嘗修讀詩記大事記皆未成書考定古
周易書說閻範官箴辨志錄歐陽公本末皆行於
世學者稱東萊先生續文獻通考理宗嘉熙二年
改諡忠亮景定二年追封開封伯從
祀孔廟明嘉靖九年改稱先儒呂子

呂祖儉

嘉靖浙江通志字子約祖謙弟受業祖謙寧
宗即位除太府丞時韓侂胄用事祖儉上封

事言甚剴切安置於韶州在謫所讀書窮理賣藥
自給所著有太愚集歷代名儒傳從弟祖泰性疏
達尚氣誼論世事無忌諱祖儉既貶祖泰嘗欲以
言報國懼累祖儉及祖儉卒乃上書請誅韓侂胄
坐杖配欽州侂胄誅詔
雪其冤補上州文學卒

馬之純

金華先民傳字師文東陽人隆興二年進士知嚴州比較時務時張栻作守大蒙賞識由

是益潛心載籍究極六經諸子百家素有藻鑑諸生中獨以大臣期喬行簡卒如其言著尚書中庸

論語說周禮隨釋類編左傳紀事編年詩文豫章雜著若干卷

邵困

嘉靖浙江通志字萬宗蘭谿人淳熙八年進士授柳州教授改潭州朱子方帥湖南薦其學行

晚歲由楚州奉祠歸家名其堂曰今是著禮記解讀易管見今是堂稿

鞏豐

萬厯金華府志字仲至武義人淳熙中以太學生擢進士第除教授漢陽軍調福州帥幕從朱

子講明義理之學聲實甚著知臨安縣改提轄左藏庫奉祠卒著有東平集二十七卷工詩多至三千餘首宋濂輩豐傳祖庭芝世號山堂先生登元城劉安世之門以道學為東平倡及其來遷也

以所學化導如東平故武義人士知尚理義之學
至豐又從東萊呂祖謙游於是中原文獻麗澤淵
源萃於一門矣

戚如琥

兩浙名賢錄字少伯金華人幼力學長游呂東萊之門務以修身齊家見諸實用東萊每

嘆異之紹熙元年登進士丙科授郴州教授遷國
子博士出知台州改袁州政績大著及卒門人私
諡曰貞白先生

時澗

金華賢達傳字子澗蘭谿人師呂祖謙淳熙辛丑進士累官朝散郎通判台州祖謙輯書說自

秦誓汴洛誥未畢而卒澗補完之有南堂集若干
卷兄雲字子雲師祖謙著尚書周官餘論未成卒

汪淳

嘉靖浙江通志金華人受業呂祖謙勵志於學授吉州教授講學者咸歸重焉

鄭宗強

萬曆金華府志字南夫金華人遊於東萊之門講貫理道篤志根源蔡文軒稱其學業精

深履行純篤後以朝請大夫致仕著有坦溪集行世

趙彥桓

兩浙名賢錄字周錫東陽人師事呂祖謙擢取應科精春秋左氏作發微百篇以進上嘉

之旋借和州觀察使金吾上將軍充接伴副使事訖特轉一官隆興元年登進士擢宣義郎累遷眉

州通判卒彥桓好學有文著述不倦詩數百篇名西征隨筆子淦夫尤工於詩

傅寅

兩浙名賢錄字同叔義烏人幼嗜學經史百家悉能成誦從唐仲友質疑問難仲友喜曰吾益

友也及聞其升陞分陝之說語門人曰職方輿地盡在同叔腹中矣寅於天文地理明堂封建井田

律歷兵制之類靡不窮究根穴訂其謬謬號曰羣書百考黃文叔欲與同列奏補以官知不可屈乃

止學者稱
杏溪先生

葉秀發

宋濂葉秀發傳字茂叔金華人師事呂祖謙唐仲友極深性理之學慶元丙辰進士授長

溪主簿轉慶元府學教授嘗著論語講義以誨諸弟子時鉅儒樓鑰婁昉鄭性之楊簡袁燮皆器秀發與之交而於簡問難尤切簡每自謂有所啓發秩滿陞政和令調桐城丞金人犯蘄黃桐為隣壤騎兵將迫家人號泣求避秀發叱之曰此正臣子致身之日苟先去如一城生聚何修城濬濠為備禦計會金人使謀者至秀發擒之亟斬以徇金人氣沮邑賴以完事定制閭忌其功不自已出上其擅斬非法降官及史彌遠當國人有自桐城來者彌遠以秀發為問其人歷言撫綏安定之詳乃擢知高郵軍高郵三十六湖水高而田下隄防不固則民且無稼秀發建石礮以疏水勢渚洩有恒無

乾溢之病後馬光祖為守思其功構堂樊梁之隄
以祀學者尊之曰南坡先生著有易說周禮說論
語講義
行世

章如愚

金華先民傳字俊卿金華人幼穎悟慶元中
登進士第累官國子博士改知貴州開禧中

被召上疏極諫時政因忤韓侂胄罷歸講學論道
遠近咸師尊之稱曰山堂先生所著有羣書考索
六十六卷文
集若干卷

何基

宋火本傳字子恭金華人父伯夔為臨川縣丞
黃幹適知縣事伯夔見二子而師事焉幹告以

必有真實心地刻苦工夫而後可基悚惕受命於
是隨事誘掖得開淵源之懿研精覃思平心易氣
以俟其通未嘗參以己意立異以為高徇人而少
變也朱熹門人楊與立一見推服來學者衆嘗謂

為學立志貴堅規模貴大克踐服行死而後已王柏既執贄為弟子序正諸經弘論英辨質問疑難或一事至十往返基終不變以待其定嘗曰治經當謹守精玩不必多起疑論有欲為後學言者謹之又謹可也基淳固篤實絕類漢儒雖一本於熹然就其言發明則精義新意愈出不窮景定五年詔舉賢被命添差婺州學教授兼麗澤書院山長力辭咸淳初授史館校勘兼崇政殿說書屢辭改承務郎主管西嶽廟終不受卒年八十一祭酒楊文仲請於朝諡文定著有大學中庸發揮大傳易啓蒙發揮通書近思錄發揮

國朝雍正二年九月奉
旨從祀兩廡

王柏

宋史本傳字會之金華人大父師愈從楊時受易論語既又從朱熹張栻呂祖謙游父瀚兄弟

皆及熹祖謙之門柏少慕諸葛亮為人自號長嘯
年踰三十始知家學之原捐去俗學勇於求道與
其友汪開之著論語通旨至居處恭執事敬惕然
嘆曰長嘯非聖門持敬之道亟更以魯齊或語以
何基嘗從黃幹得熹之傳即往從之授以立志居
敬之旨且作魯齊箴勉之質實堅苦有疑必從基
質之作敬齋箴圖夙興見廟治家嚴飭當暑閉閣
靜坐子弟白事非衣冠不見也少孤事其伯兄甚
恭季弟蚤喪撫其孤割田予之收合宗族周恤扶
持之開之歿家貧為之斂且葬焉為麗澤上蔡兩
書院師鄉之耆德皆執弟子禮其卒整衣冠端坐
揮婦人勿近國子祭酒楊文仲請於朝諡曰文憲
所著有讀易記涵古易說大象衍義涵古圖書讀
書記書疑詩辨說讀春秋記論語衍義太極衍義
伊洛精義研幾圖魯經章句論語通旨孟子通旨
書附傳左氏正傳續國語間學之書文章復古續

古濂洛文統朱子指要詩可言天文攷地理攷墨
林攷大爾雅六義字原江右淵源伊洛精義朝華
集紫陽詩類
家乘文集

國朝雍正二年九月奉
旨從祀兩廡

傅止

兩浙名賢錄字升可義烏人六經俱通尤精史
學從遊之士戶屢恒滿登淳祐五年進士第授

仙居尉未上而卒有六經講
義及南園詩文雜稿二十卷

徐僑

宋史本傳字崇甫義烏人從學於呂祖謙門人
葉邨淳熙十四年舉進士調上饒主簿始登朱

熹之門熹稱其明白剛直命以穀名齋入為秘書
省正字校書郎直寶謨閣以忤史彌遠劾罷端平
初被召遷秘書少監太常少卿手詔罷邊帥之尤無
愼剗切帝為動容太息明日手詔罷邊帥之尤無

狀者申傲羣臣以朋黨為戒命有司裁節中外浮費而賜僑金帛甚厚僑固辭不受侍講開陳友愛大義用是復皇子竑爵請從祀周敦頤程頤程顥張載朱熹以趙汝愚侑食寧宗皆如其請金使至僑以無國書宜館之於外如叔向辭鄭故事迂丞相意力丐休致帝諭留甚勤遷工部侍郎辭益堅乃以寶謨閣待制奉祠卒諡文清其學以真踐實履為尚奏對之言剖析理欲因致勸懲若其守官居家清苦刻厲之操尤人所難能

葉由庚

金華賢達傳字成父義烏人從徐僑遊與何基王柏往來尤密嘗謂古人知行並進聞一

善言見一善行未之能行唯恐有聞若為語言文字纏蔽奪其精神必待知至而後行是終無可行之日也人以為名言稱通齋先生

汪開之

萬厯金華府志字元思金華人獨善之孫也居貧力學與王魯齊為友魯齊稱其堅礪勇

往能自拔於困苦中子為己之學實開端於元思云開之嘗自著貧約云不衣絹帛不食夜飯不僱僕從不妄收買不趁人情不作雜書不轉假借不轉懇事不為妄費不借人物凡十條其卒也魯齊率朋友斂之又請於何北山為銘其墓

張潤之

嘉靖浙江通志金華人篤實清介專心問學避地長山摘其幽勝為十詠元黃潛謂其微

言奧旨世莫得聞尚賴此詩之存其高風雅韻猶可槩見云萬厯金華府志字伯誠號思誠子遊北山何文定公之門北山輯近思錄未就而卒仁山金履祥繼成其書每條皆實於潤之而後定仁山嘗稱之曰思誠子於朱門為嫡孫冰雪孤松端操凜凜

倪公晦

萬厯金華府志字孟暘金華人受業何北山之門與王魯齋為友魯齋稱其服善喜聞過

專志於下學之實仕至轉運司幹辦公事清介廉直有聲於時兄公度公武俱以學行稱

石一鰲

金華賢達傳字晉卿義烏人景定鄉貢進士少從王世傑得徐僑之端緒學茂而聲遠從

遊數百人多取高第晚年覃思於易著互言總論十卷

施郁

萬厯金華府志字景文義烏人由太學內舍登高第擢國子博士從子南一字與之咸淳進士

官太學博士與石一鰲黃潛同時並以文學教授名人科士多出其門所著有春秋經傳記要

虞復

萬厯金華府志字從道義烏人師事倪千里傳永嘉春秋之學由太學登進士第上緝熙殿四

十八規理宗大喜累官大宗正丞出知信州時史嵩之開督府以御札盡收列郡利權因上表進愛

養根本之說大忤其意遂奉祠歸居東巖十有五
年董丞相槐力薦於朝改尚書郎官輪對舉大學
正心誠意為綱領分好樂忿懣為節目上嘉納乞
外差知寧國府改知瑞州以疾草請納祿得旨轉
朝議大夫致仕著有成己集告
蒙告忠遠齋集合八十餘卷

潘墀

金華賢達傳金華人號芥軒文獻通考蜀人以
晦菴語錄類成編處州教授潘墀取論語一類

增益其所未
備刊於學宮

元

王炎澤

萬厯金華府志字威仲義烏人少嗜書稍長
治舉子業當宗末塲屋事廢因鼎意探索聖

賢微旨又從徐僑門人傳考亭之學窮居約處開
門授徒絕口不言仕進學者尊為南棧先生侍人

一本於誠言論無所隱蔽為諸生講說務推明大義不事支離穿鑿著有南陵類稿二十卷二子良

王常山教諭良
珉義烏訓導

金履祥

元史本傳字吉父蘭溪人其先本劉氏避錢武肅王嫌名更為金氏履祥幼而敏睿比長

益自策勵凡天文地形禮樂田乘兵謀陰陽律歷之書靡不畢究及壯知向濂洛之學事同郡王柏登何基之門基則學於黃幹而幹親承朱熹之傳者也自是講貫益密造詣益邃會襄樊之師日急宋人坐視而不敢救履祥進牽制搆虛之策請以重兵由海道直趨燕薊則襄樊之師不攻自解宋莫能用德祐初以史館編校起之辭弗就宋將改物所在盜起履祥屏居金華山中獨處終日儼然與物接則盎然和懌訓迪後學諄切無倦何基王柏之喪率同門士以義制服自唐堯以下接於通

鑑之前勒為一書名曰通鑑前編訓釋裁正多儒
先所未發他所著曰大學章句疏義二卷論語孟
子集計考証十七卷書表註四卷當時議者以為
基之清介純實似尹和靖柏之高明剛正似謝上
蔡履祥則親得之二氏而並充於已者也居仁山
之下學者稱仁山先生大德中卒至正中賜諡文
安歷代名儒傳論履祥守潔懷貞有管寧陶潛之
操撰述諸書皆可為學者的所考禹貢山川尤多
蔡傳所未逮

國朝雍正二年九月奉
旨從祀兩廡

許謙

元史本傳字益之其先京兆人由平江徙金華
謙數歲而孤甫能言母陶氏口授孝經論語入

耳輒不忘稍長立程自課雖疾不廢既乃受業金
履祥之門居數年盡得其奧謂學以聖人為準的

然必得聖人之心而後可學聖人之事聖賢之心具在四書四書之義備於朱子讀詩集傳有名物鈔八卷讀書集傳有叢說六卷其觀史有治忽幾微倣史家年經國緯之法起太皞氏迄宋元祐元年又有自省編畫之所為夜必書之其不可書者則不為也他若天文地理典章制度食貨刑法字學音韻醫經術數之說靡不該貫又嘗句讀九經儀禮及春秋三傳於其宏綱要領錯簡衍文悉別以鉛黃朱墨其後吳師道購得呂祖謙點校儀禮視謙所定不同者十有三條而已延祐初居東陽入華山學者翕然從之著錄者千餘人獨不以科舉之文授人曰此義利所由分也篤於孝友處世不膠於古不流於俗歲大侵謙貌加瘠或問曰豈食不足耶謙曰今公私匱竭道殣相望吾獨能飽耶中外名臣列其行義章數十上皆莫能致至元三年卒年六十八嘗以白雲山人自號世稱白雲

先生賜諡文懿何基王柏及金履祥歿至譙而其
道益著江浙行中書省為請於朝建四賢書院以
奉祠

國朝雍正二年九月奉
旨從祀兩廡

徐畸

正德蘭谿縣志字南夫一字叔範穎敏絕倫力
學好修嘗受易於朱震得其旨要無明春秋戴

記皆造其微居家孝友處朋友鄉黨正直不阿為
文雅贍有法隱居教授學者稱為天民或勸之仕
曰以經淑人是亦仕也著有周易解微三卷禮記心法二十卷

黃景昌

浦陽人物記字清遠一字明遠四歲入小學
十二歲能屬文長從方鳳吳思齊謝翱游益

通五經諸子百家之言尤篤意書春秋三傳異說
學者不知所從景昌據經為斷作春秋舉傳論又

作周正如傳考蔡氏傳正
誤古詩考晚自號田居子

劉應龜

兩浙名賢錄義烏人潛心義理之學每以古
人自期咸淳間游太學丞相馬驥高其才將

以女妻之應龜不可乃止由是名稱籍甚元至正
初起為月泉書院山長改杭州學正以身為教士
遵矩矱著有夢稿痴稿聽雨留稿共二十
卷金華賢達傳字元益人稱山南先生

胡長孺

元史本傳字汲仲永康人其先自天台來徙
父居仁淳祐丁未進士知台州軍事文辭政

事絕出四方至長孺其學益大振棲永康山中至
元二十五年詔下求賢拜集賢修撰與宰相議不
合改教授揚州移建昌錄事至大元年轉台州路
寧海主簿丁未浙東大祲戍申復無麥宣慰同知
脫歡察議行賑荒之令以餘錢二十五萬屬長孺
悉散於民托歡察不敢問延祐元年轉長山場鹽

司丞以病辭隱杭之虎林山以終長孺初師青田
余學古學古師王夢松夢松傳龍泉葉味道之學
味道則朱熹弟子也淵源既正為人光明宏偉慨
然以孟子自許惟恐斯道之失傳誘引不倦為詞
章金春玉撞碑版照耀屢司文衡貴實賤華文風
為之一變晚病喘正衣冠坐逝年七十五著有瓦
缶編南昌集寧海漫抄顏樂齋稿行於世其從兄
之綱之純皆以經術文學名之綱字仍仲嘗被薦
書於聲音字畫之說自言獨造其妙之純字穆仲
咸淳甲戌進士踐履如古獨行者文尤明潔可誦
人稱為
二胡云

黃潛

元史本傳字晉卿義烏人延祐二年進士第授
台州寧海丞地瀕鹽場亭戶肆毒害民編戶隸

漕司及財賦府者橫暴尤甚潛皆痛繩以法盜事
久不決潛為之疏剔免死者十餘人遷諸暨州判

官入為應奉翰林文字轉國子博士視弟子如朋
交未始輕納人拜學者滋益恭出為江浙儒學提
舉以秘書少監致仕未幾除翰林直學士兼經筵
官執經進講者三十有二帝嘉其忠數出金織紋
段賜之陞侍講學士知制誥上章求歸久之始得
南還優游田里間凡七年卒年八十一贈中奉大
夫追封江夏郡公諡文獻晉博極天下之書而約
之於至精剖析經史疑難及古今制度名物旁引
曲證多先儒所未發文辭布置謹嚴援據精切譬
之澄湖不波一碧萬頃魚鼈蛟龍潛伏不動而淵
然之光自不可犯著有日損齋稿二十三卷義烏
志七卷筆記一卷萬厯金華府志宗濂贊其以儒
學自奮寔然獨任斯道之重上承
朱呂道統天下學士咸知師法云

柳貫

元史黃潛傳浦陽柳貫字道傳器局凝定端嚴
若神嘗受性理之學於蘭溪金履祥必見諸躬

行凡六經百氏兵刑律歷數術方技書靡所不通
作文沉鬱春容涵肆演迤始用察舉為江山儒學
教諭仕至翰林待制與潛及臨川虞集豫章揭傒
斯齊名號為儒林四傑所著有文集四十卷字系
二卷近思錄廣輯三卷金石
竹帛遺文十卷年七十三卒

吳萊

元史黃潛傳萊字立夫集賢大學士直方之子
天資絕人七歲能屬文嘗往族父家日易漢書

一帙以去族父迫扣之琅然而誦不遺一字三易
他編皆如之衆驚以為神延祐七年以春秋舉上
禮部不利退居深裏山中益窮諸書奧旨著尚書
標說六卷春秋世變圖二卷春秋傳授譜一卷古
職方錄八卷孟子弟子列傳二卷文集六十卷柳
貫極慎許與每稱萊為絕世才潛晚年謂人曰萊
之文類秦漢間人所作以御史薦調長蘄書院山
長未上卒年四十有四君子惜之私謚淵穎先生

萬厯金華府志子士
諤金華縣學教諭

吳師道

元史本傳字正傳蘭溪人自羈州知學即善記覽才思涌溢詩歌清麗因讀真德秀遺書

幡然有志於為己之學嘗以持敬致和之說質於許謙謙復之以理一分殊之旨由是心志益廣造履益深登至治元年進士第授高郵縣丞調寧國路錄事會歲大旱勸大家得粟三萬七千六百石以賑飢民又言於部使者轉聞於朝得粟鈔賑之三十餘萬人賴以存活遷池州建德縣學田為豪民所佔按其圖籍悉以歸學茶稅尤重民以為病極言於所司權稅為減召為國子助教陞博士其為教一本朱熹之旨而遵許衡之成法六館諸生人人自以為得師以禮部郎中致仕終於家著有易詩書雜說春秋胡傳附辨戰國策校註敬鄉錄及文集二十卷師道同郡王餘慶字叔善仕為江

南行臺監察御史亦
以儒學名重當世云

戚仲咸

金華賢達傳永康人高祖如琥與從兄如圭如玉並受業呂祖謙皆舉進士仲咸從許謙

問道潛心性理之學旁通諸子百氏主教呂氏師法嚴謹學者敬憚之扁其書室曰朝陽人尊之為朝陽先生所著有春秋纂例等書

呂洙

呂溥

萬厯金華府志溥字公甫永康人從許謙講究經旨悉領其要為文馳騁雄暢

詩激烈可喜治家以禮冠婚喪祭一遵朱子所定嘗註大學疑問史論其詩文有竹溪集若干卷兄洙字宗魯亦從許謙遊同門服其精敏著有易圖說大學辨疑

葉謹翁

兩浙名賢錄字審言金華人性明達於書無不讀由家傳之端緒沂儒先之源委卓然自

欽定四庫全書

卷一百七十六

立許謙柳貫張樞黃潛咸樂與為友歷官浦江義
烏二縣教諭調簿晉江授瑞州同知致仕卒謹翁
天性孝友治家有法吉凶慶弔一遵呂氏家範所
為詩文和易平實無纖麗之態有四勿齋稿若干
卷藏
於家

聞人夢吉

金華先民傳字應之金華人父詵老嘗游
王魯齋之門夢吉受學家庭父子自為師

友七經傳疏皆手鈔成集義理所在必深究而密
察用薦者起歷處州學錄西安教諭昌國州學正
平生信道甚篤持已應物一本於誠涵養既純內
外一致晚居永康之魁山下卒年七十門人宋濂
等謂其執醇而不變舍和
而有耀私諡曰凝熙先生

馬道貫

兩浙名賢錄字德珍金華人弱冠時偕弟德
璋師事許文懿於八華山得濂洛之學文懿

期勉之甚至文懿歿哭臨制服如親喪學者稱之
著有尚書疏義六卷詩文若干卷自號一得叟

丁存

兩浙名賢錄字性初義烏人性質朴不外撓博
學善屬文尤長於詩賦屢徵明經不就嘗游宗

文何先生門相與闡明理學以邇金許之傳晚年
優游盤谷四方學者羣趨之所著有雲崖雜稿

明

葉儀

分省人物考字景翰金華人受業於許白雲語
以學者必以五倫為本以開明心術變化氣質

為先儀朝夕惕勵研究奧旨已而授徒講學士爭
趨焉語學者曰聖賢言行盡於六經四書其微詞
奧義則近世先儒之說備矣由其言以求其心涵
泳從容久自得之不可先立已意妄有是非也王
師下金華召儀為五經師以老疾辭隱居養親所
著書曰南陽雜稿吳沉稱其理明識精一介不苟

安貧樂道
死而不變

范祖幹

金華先民傳字景先金華人受業許謙之門
悉得其旨趣其學以誠意為主而嚴之以慎

獨持守之功引誘學者惓惓真切唯恐其不入於
善戍戍辟為諮議以親老辭四方大夫士莫不向
問安否以為斯文重輕孝行篤至郡守王宗顯立
純孝坊表之學者稱純孝先生著有羣經指要讀
詩記大學中庸
發微柏軒集

何壽朋

儒林錄字德齡蘭溪人從學葉儀之門洪武
初舉孝廉以二親俱老辭窮理守道不妄干

人晚自號歸全學
者稱歸全先生

汪與立

儒林錄字師道蘭溪人從學范祖幹修德立
行與同邑何壽朋齊名嘗謂學者當視古人

為不足母視今人為
有餘人以為名言

徐原

分省人物考字均善蘭溪人少從吳禮部游博覽羣書著有五經講義強學齋文集數卷太祖

改婺州為寧越府命知府王宗顯開郡學延儒士葉儀宗濂為五經師戴良為學正吳沉徐原為訓

導時學校久廢至
是始開弦誦之聲

唐懷德

分省人物考字思誠金華人仲友七世孫受業許謙六經百家之言無不研究其學以濂

洛為宗粹然一出於正濂訪副使暢篤聘講淮陰
聞者傾服嘗與宗濂辨諸子是非凡九十餘種歷
誦其文以對濂推其博懷德曰徒博陸澄之書厨
耳吾則藉以窮理而施諸事也用部使者薦擢金
華縣學教諭遷衢州學錄卒著有破萬總錄
六經問答鈎元集書學指南存齋稿百餘卷

胡翰

金華賢達傳字仲申金華人甫七歲拾道中遺鏹候遺者至而還之初受業於吳師道繼學文

於吳萊執經於許謙明初以賢才起赴京會有以金華民藉田出兵者翰為言民懦不習軍旅詔罷

之授衛州教授俄奉旨纂修元史書成辭歸卜居長山之陽學者稱長山先生所著有春秋集義胡

仲子集

朱廉

萬厯金華府志字伯清自少刻苦勵志淹貫經傳悉領要義學文於黃潛遂知名明初知府王

宗顯辟為郡學師及浙東行省右丞李文忠開鎮嚴州尤加禮敬遂移長釣臺書院洪武三年詔修

元史起為纂修官史成拜翰林編修既而授經楚府陞長史久之病瞶致仕歸窮經講誦嘗取朱熹

語類摘其精義名曰理學纂言有文集十七卷

汪仁壽

金華賢達傳字仲山金華人善記覽經史百家靡不窮究尤耽性理之說號靜齋所著有

靜庵稿分省人物考子雨能繼家學與
呂肅陳誠汪旻為文字交人稱四友

宗誠

金華賢達傳字仲實義烏人受業許謙經明學邃家居授徒所著有孝友通紀及詩文同邑馮

翊字原輔亦受業許謙洪武中以明
經薦除新淦知縣著有崑山片玉集

許元

儒林錄字存仁金華人大父謙學於仁山金氏得朱子之傳明祖初起幸金華訪求其後乃驛

赴金陵拜京學教授仍命入傅皇太子及諸王乙巳九月始置國子學命為博士奉命進講經史極陳洪範休徵咎徵之應吳元年四月上至白虎殿問孟子何言為要對曰勸國君以行道施仁政省刑罰薄稅歛乃其要也冬十月擢為祭酒最見禮遇設立教國子條例數十事皆見施行旣而浙

江僉事程孔昭誣劾其過
安置韶州後遇赦還卒

章懋

葵書字德懋蘭谿人嘗講學於楓木山學者稱
楓山先生成化二年舉會試第一選庶吉士館

試文多諷諫主者陳文惡之欲出之外劉定之舉
陳選事為勸得留授編修甫踰月元夕張燈命賦
詩懋與同館黃仲昭莊景相率諫止謫臨武知縣
改南大理評事評駁稱允遷福建僉事一意便民
行法自如直指使者弗善也會以考績北上致仕
歸杜門讀書楓山庵中四方來學者甚衆御史姜
洪等論薦懋力辭未幾為南祭酒累疏言教養良
法復移疾歸正德五年再起南太常寺卿六年遷
南禮部右侍郎致仕嘉靖元年進南禮部尚書以
年幾九衰遣行人存問而懋已卒於里第謚文懿
遺文數卷語錄一卷年譜一卷俱名人所輯隆萬
間崇祀正學祠名臣言行錄懋年四十一得請歸

閉門讀書畢心體認之學而言必根志志必先用
用必赴功門人董遵稱公學由乾惕德含坤章進
得泰之景征退得遯
之嘉遯殆深於易者

應璋

萬厯金華府志字德夫永康人嘗受學於楓山
一見語以黃勉齋所云真實心地刻苦工夫璋

佩服弗懈楓山稱其純篤授徽州訓導再遷羅源
教諭正己率人士皆樂從年九十終學者稱東白
先生著有四書索
微尚書要畧等書

程文德

傳詳
名臣

凌瀚

兩浙名賢錄字德容蘭谿人性端毅負大志不
規規科舉之業早游楓山之門言行必期信果

步趨必由規矩與學者言尤嚴義利之辨嘉靖乙
酉以易經魁兩浙益肆力學問凡天文地理名物

度數以至禮樂兵刑漕運水利之類無不究心四方從遊者日衆因材而成就之詔選得泰寧教諭日與諸生講明理學立條約以正其趨貧者分俸資之遷周府紀善上崇德講學等書王甚敬焉卒於官著有羣書類考太平策畧郤武泰寧等志金華正祠錄等書

董遵

分省人物考字道鄉蘭谿人受業楓山之門潛心理學專志力行貢入禮部授江西南昌府學

司訓正身率物士多向風時蔡虛齋郤二泉相繼視學徵主白鹿洞書院轉溧陽教諭陞知浦江縣在任一年百廢具舉疏乞近地便養忤當道意調知廣東感恩縣懇請終養歸家無儋石儲而事親曲盡孝道著有金華淵源錄及文集若干卷從子暈事父母及生母孝人以一門二孝廉稱焉

胡東

湯溪縣志字時震博極羣書師事楓山得其宗旨領正德癸酉鄉薦授醴陵令銳意造士居官

六年奏最當遷忽投牒乞歸所著有易經象訣歷朝史評古愚論草諸書太倉王元美銘其墓曰為儒而醇為吏而循醇不近名循不近禁是以稱之曰古愚先生

章品

金華先民傳字廷式蘭谿人以易學知名年踰五十登進士或勸之減年通籍却之授兵部車

駕司主事陳治安十策多見采行陞武選司員外郎致仕著周易羽儀春秋經傳辨疑禮記大旨學庸大義辨疑孟子篇類正蒙發微含章子集皆板行其他周易集傳存疑魯經鄒書學庸精義正俗編金華文獻錄增注黃庭經歷代興亡鑑格物志奏議稿藏於家

應典

分省人物考字天彝永康人性沉篤刻志學問登正德甲戌進士授職方司主事與江山周文

興論學有悟遂引疾歸同仙居應良黃巖黃綰過從講切又師王守仁授致良知之旨建書院於壽

山集諸生講學再起車駕司主事
念母病目引疾歸朝紳論薦不起

李珙

萬厯金華府志字侯璧永康人有志理學徒步見陽明先生於越授以致良知之訣珙獨居精

思盡得其旨同門錢緒山王龍溪輩推重之在東鄉聘主豫章書院教事及陞淑浦日與同志發明師訓聽從者衆平居不事生業死之日惟曰只此見在良知吾今緊密受用性命皆了著有質疑稿若干

程梓

舊浙江通志字養之永康人性敏慧少聞何王金許之學欣然慕之讀正學編躍然曰道在是

矣弱冠為諸生徒步往姚江師事王守仁與王畿互相印正歸即壽山石洞倡明正學與先達應石門過從講究隆慶辛未子正誼登進士勵之曰字內不少科第少聖賢耳及正誼恤刑吳魯以獄決

未恆政府意被斥粹欣然曰兒以無寃民壽我我願足矣年八十卒學者祀於五峯書院稱方峯先生

杜惟熙

東陽縣志字子光號見山成童時即有志理學時永康盧一松講學於五峯書院惟熙北

面事之多所領悟嘗言學者一息不昧則萬古皆通一刻少寬即終身欠缺其學以復性為宗克欲為實際精研力究不舍晝夜晚乃益純張鳳梧建崇正書院聘主教席年八十餘端坐而逝著有悔言續錄數篇學

者稱見山先生

浙江通志卷一百七十六

欽定四庫全書

浙江通志卷一百七十七

人物五

儒林下

衢州府

南北朝

鄭灼

南史本傳字茂昭東陽信安人幼聰敏勵志儒學少受業於皇侃梁簡文在東宮雅愛經術引

灼為西省義學士承聖中兼中書通事舍人仕陳武帝文帝時累遷中散大夫後兼國子博士未拜

卒灼性精勤尤明三禮少時嘗夢與皇侃遇於塗侃謂曰鄭郎開口侃因唾灼口中自後義理益進家貧抄義疏以日繼夜筆毫盡每削用之嘗蔬食講授多苦心熱若爪時輒偃卧以爪鎮心起便讀誦其篤志如此

宋

慎知禮

傳詳孝友

劉絢

宋史本傳字質夫常山人以蔭為長子令歲大早府遣吏視傷所蠲稅財二三絢力爭不得封

還其揭請易之富弼數曰真縣令也元祐初韓維薦其經明行脩為京兆府教授王巖叟朱光庭又薦為太學博士卒於官絢力學不倦最明於春秋程顥每言他人之學敏則有矣未易保也若絢者

吾無疑焉續文獻通考絢深於春秋作傳未就病劇尚以例類質其父垂絕猶道詩書語可謂篤於學者

周穎

弘治衢州府志字伯堅開化人受業安定胡公

當公心以事君平心以待物無以難行事強人主無以私喜怒壞公朝賢士大夫抹以書進仁宗欲用之熙寧詔舉有學術者守以穎薦賜進士第授校書郎王安石問新法何如對曰歌謠甚盛因高誦曰市易青苗一路蕭條安石不樂出宰樂清有文集行世朱子景行堂記正介先生周君穎之行信於鄉而聞於朝其立言垂訓褒善貶惡足以為後世法

祝常

兩浙名賢錄字履中常山人從胡安定學操履端毅未嘗以辭色借人登進士第王安石深器

之時有詔解三經義常出正義反覆辯論者題
之遂忤安石意出令平陽終殿中丞有蓬山類苑
元誥正謨諸論及
清高集行於世

劉牧

弘治衢州府志西安人字牧之登進士終屯田
員外郎授易數於穆修著易解與易象鈞隱圖

王安石
誌其墓

呂防

明一統志龍游人熙寧中進士有學行龍游士
子發舉自防始累官至大中大大夫舊浙江通志

字大防嘉祐末於縣南鷄鳴山設義學士之慕道
從遊者衆一日登山見鷄鳴棘叢中張羅飼之得
白金十數
鑑輸之官

江緯

兩浙名賢錄字彥文常山人元符三年以太學
生上封事指宗名對稱旨賜進士及第緯精於

經學口授諸生能發前儒未發之旨從子少齊少
虞漢皆從受業若負笈而至者則汪藻程俱李處
業趙子畫等七人擢科顯仕時人指為文中虎遂
扁講學之所曰七賢堂紹興間任太常少卿以言
事忤時乞
身歸老卒

江躋

弘治衢州府志常山人字元壽登大觀二年進
士第為殿中侍御史在朝論事以正心誠意為

本紹興初率全臺攻丞相朱勝非更五六疏忤旨
一時俱罷後高宗思之賜手詔以司農卿召未及
用卒贈銀青
光祿大夫

徐存

弘治衢州府志字誠叟江山人從龜山楊時學
朱熹來訪甚佩服有六經講義中庸論孟解門

人如周賁周孚柴衡鄭雍陸律江泳後皆知名方
輿勝覽逸平先生徐存受業於程氏之門人學與

行高講道於家弟子
自遠至者常以百數

柴禹聲

嘉靖浙江通志字元振衢州人受業於楊龜山屢魁鄉薦學者宗之紹興間高閣擢國子

司業以禹聲堪充史館特薦於朝
兄禹功字懋績晚亦遊龜山之門

夏僕

兩浙名賢錄字元肅龍游人與周升繆景仁為友皆以明經教授時號三俊俱舉進士僕常語

其徒曰文雖小技自有上達之理但為科舉
所累故判本末為兩途耳著有柯山書解

劉愚

宋史本傳字必明龍游人幼警敏方學弱冠入太學有聲受業者甚衆上舍釋褐居第一調江

陵府教授早晚為諸生講說同僚相率以聽移安鄉縣令民不見吏而賦自足邑有范仲淹讀書地為繪像立祠士競知勸雅不樂仕進致仕顏垣敗壁蓮蒿蕭然著書自適書禮語孟皆有解年八

十三卒門人私諡曰謙靖先生

鄒補之

嘉靖浙江通志字公袞開化人受業朱呂之門淳熙初舉進士判江寧府著有春秋語孟

注兵書解宗朝職畧等書

江介

舊浙江通志字邦直開化人少穎悟一日讀程子書至水清性善之說大有感悟復與朱子相

講明官數郡皆有惠政士民爭繪像立祠轉奉議郎卒

鄭升之

弘治衢州府志字公明師徐存擢進士第除弘治衢州府志字公明師徐存擢進士第除

甚切至名試館職後為吏部郎守賀州有文集

元

江孚

弘治間州府志常山人受業於金華許文懿公之門以書經中至順壬申科鄉第考官劉岳申

葉峴見孚龍虎臺賦驚異將上之尋以罷科而止時選賦者類聚五百餘篇僉以孚作為最刻為學

者矜式弟起詞氣雄辯與伯兄叔戴齊名人號三江先生云

魯貞

明一統志開化人著有春秋案斷中庸解易注余闕薦之不起弘治間州府志貞字起元元統

二年
舉人

明

何初

明一統志常山人博通經史洪武中知仁化縣遷巴東教諭召修書傳書成調開化造就人才

士風為
之益振

徐蘭

弘治衢州府志字與善開化人洪武初入試京

要門人歐陽齊進於朝有自鳴藁鳴陽藁
五經格式藏於家有為學次第傳於世

吾昇

分省人物考字景瑞開化人通書易春秋以鄉
舉入太學與蘭谿章懋安福劉戡四明楊守陞

友責善輔仁多所裨益既而諸子皆舉進士昇太
息曰親老矣尚擇祿為耶就江浦教諭迎父就養
教以敦本力踐為先務鑒池種蓮亭其中曰求樂
與莊行人景洒然於吟風弄月之趣久之乞終養
歸朝夕養志不違執親喪一於禮老猶毀頓與弟
暎友愛無間復遠祖祠田歲時祭掃胥宴集以合
族焉昇學專為己不溺於記誦辭章之習四方來
學者履常滿昇書太極西銘示為學本原又謂學
者曰學須養氣氣充即天下事無不可辦者人土
即其所居稱文山先生兩浙名賢錄著有朱子讀

書法還山稿
五箴解等書

鄭伉

獻徵錄字孔明常山人十三讀易治舉子業二十為博士弟子及省試一再不合棄之曰顯親

揚名恐不在是也乃走豐城拜於丁潛軒之門求踐履實學時年三十餘矣復見吳康齋於崇仁康齋曰此間工夫非朝夕可得恐誤子遠來對曰此心放逸已久求先生復之耳敢欲速乎因受小學日自驗於身心徐得聞四子六籍之要久之於道有見乃歸築室於龍池之上日取諸儒議論一切折衷於朱子一時名公若章楓山吾文山張東白皆與相可否著有易義發明卦贊讀史管見觀物

餘論蛙
鳴集

王璣

傳詳
名臣

徐璉

號南澗師表學宮務敦踐履

宋鴻

兩浙名賢錄字用儀開化人學務深潛每事必求實踐受易於吾亭為所器重四方從遊者甚

衆端本正業多所造就司訓宜興以道自尊士民愛慕人人以為父師手不釋卷對妻子如嚴賓至於聲利泊然若遺人不得窺其際也卒於官著有白石漁溪蕙石在音諸稿

周積

儒林錄字以善號二峰江山人少遊章楓山門後復受易於蔡虛齋庚午舉於鄉聞王陽明倡

道東南往師事之初疑知行合一之說陽明反覆示以立誠之道遂超然有悟嘉靖丙戌謁選授南安推官有古循良風陽明將大軍征思南供給調度自廣班師度大庾得疾薨積躬親殯殮心喪三年如一日陞知沅州政聲大起遷德王府長史踰年致仕歸年踰八十猶矻矻如壯夫性喜講學晚年致仕歸年踰八十猶矻矻如壯夫性喜講學晚

年矯其弊曰為學如治病學不自體力行是徒講藥方類也人以為至言卒年八十三

徐需

衢州府志字孔霖江山人嘉靖辛丑進士師王守仁悟良知之旨為監察御史抗疏救夏言廷

杖出為河南督學造士尤多轉廣東布政使以清介聞致仕歸築書舍於東溪著書談道老而不倦

壽九

十五

王之稷

薦從李襄敏講王陽明學初仕含山令加意

惠民遷達州守政績益著鐫六經要旨及蒙訓女訓家禮小學諸書以勸後學生平純孝周恤宗族

惠施戚里身心性命之學措諸躬行子任衡亦以學行稱

葉秉敬

西安縣志字敬君弱冠擢省魁萬曆辛丑成進士權荆闕有寬政守大梁督學中州士民

稱之叅江藩以憂歸起荆西尋移南瑞未行卒秉
敬淹貫萬卷著述鴻富擁臯比講學四方請益盈
戶外撰書凡四十餘
種海內稱為名儒

方應祥

衢州府志字孟旋西安人為文根極性命自
開阡陌非六經語不道萬厯丙辰進士授南

兵部職方郎例多餽遺應祥悉却除之轉祠部郎
歷陞提督山東學政奔母喪歸尋卒應祥山居時
講求性命之學從遊者踵相接遂擴廬舍以居之
發明身心性命之旨循循善誘誨之不倦人以其
功不下瀟
溪伊川云

蔣泰賓

開化縣志字嘉仲性孝友清介嚴正不妄友
二人以貢入南雍選職未就遂杜門不出聚

後輩講學年八旬手未嘗釋卷著有三經秘錄易
存詩可春秋取銑溪山堂詩文四卷一日無疾坐

逝及門誄之曰在漢林宗在宋康節
靜修魯齋先生弗屑時以為確論

嚴州府

宋

喻樗

宋史本傳字子才其先南昌人後徙嚴少慕伊洛之學中建炎三年進士第趙鼎去樞密居常

山樗往謁因諷之曰公之事上當使啟沃多而施行少啟沃之際當使誠意多而語言少鼎竒之都督川陝荆襄辟為屬紹興初高宗親征樗見鼎曰公度此舉果出萬全乎鼎曰義不可更屈故贊上行耳事之濟否非鼎所知也樗曰然則當思歸路鼎曰策安出樗曰張德遠有重望居閩莫若使其為江淮荆浙福建等路宣撫使俾以諸道兵赴闕下命下之日府庫軍旅錢穀皆得專之宣撫來路

即朝廷歸路也鼎入奏起浚知樞密院事浚至執鼎手曰此行舉措皆合人心鼎笑曰子才之功也於是往來鼎浚間多所裨益授秘書省正字樗與張九成皆言和議非便秦檜既主和出知舒州懷寧縣通判衡州已而致仕起為大宗正丞轉工部員外郎出知蘄州孝宗即位用為提舉浙東常平以治績聞淳熙七年卒嚴陵志樗建德人號玉泉著有中庸大學論語解及玉泉語錄行世

方慤

兩浙名賢錄字性夫桐廬人性至孝父死廬墓三年領鄉薦表進禮記解於朝詔賜上舍釋褐

而頌其書於天下學者宗之居官以剛廉稱家置萬卷書堂雖老手不釋卷朱文公嘗曰方氏禮記解儘有說得好處不可以其新學而黜之

錢時

嚴陵志字子是淳安人弱冠淹通經史以易領漕舉絕意仕進究明理學遊慈湖之門為高弟

欽定四庫全書

卷一百七十七

袁甫持節江東創象山書院延主講席學者興起
相臣喬行簡薦之朝授秘閣校勘下有司令取所
著尚書演義學詩管見周易釋傳四書管見兩漢
筆記綴進未幾出佐浙東倉幕召入史館除檢閱
丐祠授江東帥屬歸淳祐五年卒慈湖嘗為書融
堂二大字門人稱融堂先生有國朝編年春秋大
旨百行冠冕冠婚記蜀阜前後稿嘉定講書稿英
烈廟實錄錦江雜著諸書行於世郡守李鏞縣令
虞焄各肖其
像祠於學

詹儀之

明一統志遂安人時張栻守郡呂祖謙分教
儀之日以學問為事嚴陵志字體仁紹興二

十一年進士淳熙二年知信州及帥廣東首以濂
溪舊治立祠曲江上後論廣鹽官鬻之弊孝宗題
之除吏部侍郎知靜江府代者中以飛
語遂有袁州之行既歸而歿公論惜之

徐孝恭

嚴陵志字季中淳安人與兄孝寧孝友自邑郭遷河溪杜門讀書五經皆精究而孝恭尤

深於易人號五經徐氏隆興淳熙間兄弟聯登進士第孝恭主德化簿政教兼善士多從之

趙彥肅

兩浙名賢錄字子欽建德人天資孝友務聖賢之學窮理盡性弗深造自得弗措也登乾

道進士第宰臣周必大薦之甚力彥肅益以近名為嫌仕至寧海軍節度推官著有易說廣雜學辨士冠士昏饋食圖行於世朱文公觀其書嘆曰近世未有如此看文字者學者稱復齋先生

胡子廉

嚴陵志字淳安人自幼慎重不苟言笑弱冠博極羣籍不肯作舉子文字聞東萊呂成公之

學遂從之遊盡得其趣窮居樂道以終其身

方鎔

兩浙名賢錄字伯治淳安人兩魁郡試後棄去盡心聖賢知行之學每曰人與天地對立者文

藝云乎哉日訓諸子所講明必以窮理盡性為先
至應事接物則以持敬實踐為功二子逢辰逢振
前後及第乃曰吾昔以為不足為者爾曹勿
謂足也歷官奉直大夫兩淮制置司叅謀官

胡應璩

嚴陵志字粹翁淳安人講明性理之學隱
居教授不求仕進著理髓三卷學者宗之

洪揚祖

兩浙名賢錄鎮東節度判官璞之子嘗從袁
甫錢時講貫義理之學以切直忤時調寧浦

教授辟廣西帥幕論嶺南買鹽及橫山以錢易馬
事多所裨益遷京教除太博置登善錄士多嚮風
名試館職除正字輪對者三懇懇以正心
誠意啓沃闕號開溪有文集藏於家

呂人龍

萬歷嚴州府志字首之淳安人登景定三年
進士第嘗受業錢融堂之門講明義理所造

日高胸次灑然有浴沂詠歸氣象學者因
其所居稱為鳳山先生有鳳山集行世

陸震發

萬曆嚴州府志字德甫淳安人少聰敏淹洽而尤明於春秋淳祐中知州王似薦之朝以

親老乞鄉校官就養乃授學諭嘗譔修學記云人心本自虛明廣大無賢不肖均具至理特患物於物而不能物物耳其修己教人一本諸此著有春秋講義聚志一卷

方逢辰

廣興記淳安人鎔子舉進士第一官吏部尚書因賈似道東政遂乞歸杜門講學稱蛟峯

先生嘉靖浙江通志元世祖詔起之辭不赴卒於家逢辰無書不讀而會極於周程諸子之學所至以教化為先務以繼往開來為己任著有孝經解易外傳尚書釋傳大學中庸註釋格物入門諸書嚴陵志字君錫初名夢魁理宗改今名度宗賜手詔云近進士一科文章盛而古意衰卿以儒碩創家塾以程朱之學淑其徒朕甚嘉之其眷遇如此

方逢振

嚴陵志字君玉逢辰弟登景定三年進士第歷太府寺簿宗亡退隱聚徒講學於石峽書

院以終焉學者稱山房先生

傅崧之

嚴陵志字宗山壽昌人刻志好學通詩書戴禮弱冠以兩經領鄉薦鄉人尊之稱平齋先

生咸淳四年與子明龍同登進士第而崧之為榜眼授慶元觀察推官以內艱不赴服闋丞相馬廷

鸞言於朝調平江觀察推官以勤政卒

何逢原

兩浙名賢錄字文淵分水人咸淳中累官中書舍人陳時政十事言甚剴切已而引疾去

至元中薦授福建儒學提舉辭不赴卒於家逢原端究經史旁通陰陽星歷醫藥之書著有易詩書

通旨四書解說玉華集若干卷藏於家

何夢桂

嘉靖浙江通志字巖叟淳安人咸淳進士為太常博士歷監察御史所著有易衍中庸致

用等書嚴陵志元初御史程文海薦之朝授江西儒學提舉不赴築室小有源著書自娛學者稱為

潛齋先生

魏新之

嚴陵志桐廬人受業於方蛟峯得程朱性理之學登咸淳七年進士第除鄞府教授歸隱

鄉里學者稱石川先生

方一夔

萬厯嚴州府志字時佐淳安人幼承家訓壯與何潛齋諸老游學問該博行誼醇篤應薦

領教郡庠未幾退隱富山授徒講學門人稱富山先生有富山遺稿

元

夏希賢

嚴陵志淳安人究明性理洞詣本原而會其極於象山慈湖之要杜門不出者三十餘年

家貧

泰然有古君子風學者稱之曰自然先生子清之大之潛之皆承家學

方道

嘉靖浙江通志字以愚淳安人至順二年進士授翰林編修所撰后妃功臣諸傳筆削大

義獨斷於心無能議者調嘉興推官凡讞囚必脫其桎梏賜之飲食溫言和氣以探真情再調杭州

判官引疾歸著有春秋集釋十卷愚泉集詩稿十卷詩說文說各一卷

邵大椿

嚴陵志字春叟壽昌人號顧齋年十二領鄉魁赴南省不利歸益勵志明於理學歷壽昌

龍游教諭主晦菴書院山長元初士子溺於辭章之習大椿倡明理學以淑人心學者始知所趨向

著有四書講義若干卷

魯淵

傳詳
忠臣

明

張復

嚴陵志字明善淳安人德性宏毅博通五經而尤邃於春秋明郡守親聘司訓郡庠學者翕然宗之稱為書隱先生著有春秋中的一卷至今論淳安春秋者必曰吳朝陽宗夢鼎魯道源張明善四先生云

洪源

萬歷嚴州府志字子泉淳安人少知問學尤精於易洪武中以太學生授安仁學諭專以明道

務實為先每謂諸生曰講學須明開道須行毋飾外以叨虛名歷教滁州邵武福州持心如一日既

卒以子璵貴
贈工部主事

鄭崇

壽昌縣志字景名少從鄉先生邵顧齋明性理之學且遠宗東萊之傳邑生儒皆師事之質以

經史奧義口如涌泉浙江分巡魏觀延見甚加禮焉嘗歎曰道學淵源文章富瞻近代莫及也

劉候

萬厯嚴州府志字原道一字伯元壽昌人年十九以詩經領正德庚午鄉薦受業陽明先生學

有源委嘉靖十三年提學林雲同聘主天真書院一時學者皆趨焉

洪鼎

兩浙名賢錄字廷器壽昌人數歲父口授尚書過耳不忘稍長博綜子史百家下筆千言立就

父喪哀毀肖像於室旦夕饋食如事生領正德庚午鄉薦授福建邵武教諭廣置學舍館諸生之貧者而衣食之薦推國子助教出判鳳陽歸築室蓮谷精研理學貫通六經妙契一中之旨毅然以明道為任士類宗之著有讀易索隱大學參義中庸通旨八詠析言等書行於世

陳瑋

萬歷嚴州府志字良用建德人嘉靖壬午舉人與同邑俞淳從章懋游後授長泰知縣有聲擢

刑部主事淳授博羅訓
擢都陽諭今祀博羅

方應時

萬歷嚴州府志字以中遂安人銳志潛修一宗紫陽之學為諸生即請邑令復瀛山書院

建格致堂以祀文公舉孝廉則延錢塘王先生汝止登格致堂講學不輟迨令長泰故朱子所治邑也舊有祠祀會時宰議廢宇內書院是祠亦在毀中應時力請當道特疏留祀陞南繕部郎肅清樵政告歸叔宗祠仍仿文公家禮刻復古維風錄瀛山書院志讀書漫興稿

溫州府

宗

王景山

萬歷溫州府志初名開祖永嘉人登皇祐第

經蘊著儒志編曰復者性之宅無妄者誠之源又
曰學者離性而言情奚情之不惡為東嘉道學倡
郡守楊端立儒志坊表之學者稱儒志先生儒志
編序先哲王氏景山舉進士以所如不合退與其
徒講學所著僅存此編其言曰孟子以來道學不
明吾欲述堯舜之道論文武之治杜淫邪之路開
皇極之門非有所
見而能為是言哉

周行己

萬歷溫州府志字恭叔永嘉人風儀秀整語
音如鐘讀書十行俱下時尚新學行己獨往

伊洛從二程子遊作顏子不貳過論伊川可之登
元祐第宣和初除秘書省正字卒於鄆有文集三
十卷方輿勝覽行己為太學博士求便養親詔授
本州教授發明中庸之旨此邦始知有伊洛之學

舊浙江通志族孫去
非為張南軒高弟

許景衡

傳詳忠臣

劉安節

劉安上

萬厯温州府志安節字元承永嘉人登元符第名對便殿言東宮宜

擇宮屬及論奢儉與君子小人和同之異上稱善除監察御史後謫知饒州徙宣州饒民遮道泣留謂吾饒自范文正後惟安節一人宣州大水大疫賴安節全活以萬計猾胥相戒曰神可欺公不可欺卒於官部使者表其勤民致死詔官其子誠弟安上字元禮鄉里號二劉登紹聖第徽宗稱其蘊藉有大臣體除監察御史歷官右諫議大夫中書舍人給事中終朝請大夫文安縣開國男方輿勝覽安節紹聖間與弟安上從程氏學俱以學行見推鄉里

欽定四庫全書

浙江通志
卷一百七十七

十四

戴述

明一統志字明仲永嘉人元符中進士嘗從程伊川求成己之學仕至臨江太守弟迅亦以文

稱學

趙霄

萬厯溫州府志字彦昭瑞安人博學通今古十歲賦猛虎行鄉先生咸奇之少孤析產悉以屬兄入太學登崇寧第為濟州教授導學者以篤學力行不專事科舉東方土俗為之變名聞京師召為處辟雍李彥立一見稱

為趙顏子官承事郎

張輝

明一統志永嘉人喜問學雖老儒莫能逮政和初進士官至吏部尚書數文閣待制萬厯溫州

府志輝字子充自六經諸子歷代史記下至百家之說皆辨析精微議論疊疊居喪哀毀廬墓三年有甘露降庭日從事治氣養心之術學者從之益衆嘗撫古人行事斷以己意曰草堂語錄人稱草

堂先生子孝愷字思豫力學尚節
義登紹興庚辰第終兵部架閣

林石

明一統志瑞安人時王安石新經盛行石獨以春秋學教授鄉閭學者稱塘奧先生萬厯温州

府志石字介夫初習進士聲律既而曰古人之學不如是也遂刻意諸經後春秋為時所禁絕意仕

進躬耕養母郡丞趙岷邑令朱著同謁其母或偕石游山林間所至唱和有三游集

沈躬行

萬厯温州府志字彬老永嘉人始從塘奧林氏後從伊川程氏藍田呂氏其學以中庸大

學為本篤信而力行之故能卓然以聖賢為依歸平居色怡氣和似不能言及辨是非則毅然不可

奪從弟琪字東美亦以行義稱

蔣元中

嘉靖浙江通志永嘉人力學多聞元豐中作新太學與郡人周行已等八人皆見道超卓

為四方學者矜式溫州府志元中著經不可使易
知一論太學刻於石紹興初郡守張九成下車詣
學口誦此論後學益知向方自周
恭叔至元中稱元豐太學九先生

鮑若雨

萬厯溫州府志字商霖嘗構亭於所居之雁
池扁曰敬亭值宣和方寇之亂率鄉人捍禦

有司奏功第一不受賞著有程門問答錄敬亭文
集張繹敬亭記商霖自永嘉來學於伊川先生勤

苦自勵早夜孜孜不舍
先生門人以為畏友

謝佃

萬厯溫州府志字用休瑞安人游洛從伊川學
永嘉洛學自許景衡始而用休與潘旻繼之今

程氏全書與伊洛淵源所載問答皆根據至理其
所得深矣後以賢良薦知閣門事卒潘旻字子文
瑞安人與鮑若雨謝用休同入洛從伊
川學性資敏悟博極羣書隱居不仕

陳經正

萬厯温州府志字貴一平陽人慕伊洛之學與弟經邦經德經邦永嘉鮑若雨俱受業二

程之門經邦字貴新大觀三年進士終迪功郎有問答見二程全書及伊洛淵源東嘉先哲江南文

錄獻等

湯建

嘉靖浙江通志字達可樂清人於天文地理古今制度考覈精詳以其學授徒學者稱為藝堂

先生每夙興必讀易一卦退與朋友商論欣欣自得年踰八十卒有詩衍義論語道德經解

宋之才

東甌詩集字廷佐瑞安人登宣和第嘉靖浙江通志之才學於楊時遂祖程氏學教授京

北府每言士負卓犖奇材皆可入聖賢之域患速售耳故深務韜養積十八年不易初官丁母憂服

除入為校書郎遷司業權禮部侍郎乞去之才性恬靜寡慾操履潔白難進易退雖歷仕五十年而

屏處之

日居多

丁昌期

兩浙名賢錄永嘉人以明經篤行師表後進嘗作醉經堂鄉人尊之曰經行先生三子寬

夫三舉鄉貢廉夫舉八行志夫登紹興進士第俱好古力學曰侍父側弟兄商論如師友不為苟且曰此理天下所共不可為家庭屈執親喪斥去浮屠歲時祭享一遵古禮

陳鵬飛

萬歷温州府志字少南永嘉人其學不為章句新說必本人倫正論而趨於深厚兩舉於

鄉俱第一登紹興第調鄭簿召為太學博士兼崇政殿說書遷禮部郎初秦檜子熈在永嘉從鵬飛學至是為侍郎所下文案多臆決鵬飛每批其後還之熈寢不平及侍經筵講天王來歸惠公仲子之謂高宗忽問母以子貴何如鵬飛以正對謂公羊之說非是時檜欲尊崇太母以效容悅大怒諷

言者勅鵬飛議議崇寧典禮謫
惠州卒有詩書解羅浮集十卷

鄭伯熊

萬厯溫州府志字景望永嘉人德行夙成尤
邃經學登紹興第歷國子司業宗正少卿乞

外以龍圖閣知寧國府卒謚文肅紹興末伊洛之
學稍息復於伯熊得之弟伯英伯海皆知名由是
永嘉之學宗鄭氏有鄭景望
集伯英所著有歸愚翁集

鄭汝諧

兩浙名賢錄字熙績平陽人操行純固言動
必謹於禮博學強記老不釋卷經史百氏器

數刑名之書無所不覽時號武庫紹興中入太學
會本朝稱壽覃恩封其母乃曰吾母為命婦吾復
何求於是歸隱

蔡幼學

傳詳
名臣

陳傅良

宋史本傳字君舉瑞安人為文自成一家從者雲合永嘉鄭伯熊薛季宣皆以學行聞傅

良師事之入太學與張栻呂祖謙友善登進士甲科教授泰州改太學錄出判福州知桂陽軍除吏部員外郎輪對以周禮說十三篇上遷秘書少監兼權中書舍人帝疾稍平過重華宮明年重明節復以疾不往傅良上疏帝將從之百官班立以俟帝出至御屏后挽帝回傅良趨上引裾后叱之傅良哭於庭后益怒傅良下殿徑行寧宗即位召為中書舍人兼侍讀直學士會詔朱熹與在位宮觀傅良言熹難進易退內批之下舉朝驚愕臣不敢書行熹於是進竇文閣待制嘉泰二年授集英殿修撰進寶謨閣待制終於家謚文節著有詩解詰周禮說春秋後傳左氏章指行於世萬厯温州府志學者稱止齋先生子求己登科終雷州倅

戴溪

宋史本傳字少望永嘉人有文名淳熙五年省試第一由禮部郎中凡六轉為太子詹事兼秘書

書監景獻太子命類易詩書春秋語孟資治通鑑各為說以進權工部尚書除華文閣學士嘉定八

年致仕卒贈端明殿學士謚文端萬厯温州府志太子親書明經字扁其堂學者稱岷隱先生有岷

隱集孫桐字文子登嘉定第為秘書郎有五經說

葉適

傳詳名臣

張淳

兩浙名賢錄字忠父永嘉人工古文尤習冠婚喪祭古禮其器制損益考訂無遺校讐儀禮為

之句讀欲考禮者必請正焉朱子通解首引用其說試特奏得初品官不出仕朝廷知其賢屢命監

南嶽廟凡五任竟不食其祿人問之曰國家養賢豈俟請耶卒隱約以終

葉味道

宋史本傳初名賀孫以字行更字知道温州人刻志好古師事朱熹試禮部第一時僞學

禁行味道對策率本程頤無所避既下第復從熹於武夷山中學禁開登嘉定十三年進士第遷宗學諭輪對言人主務學天下之福也必堅志氣以守所學謹幾微以驗所學正綱常以勵所學用忠言以充所學從臣薦味道可為講官乃授太學博士兼崇政殿說書帝疑伯有之事涉於誕味道對曰陰陽二氣之散聚雖天地不能易有死而散者其常也有不得其死而鬱結不散者其變也蓋諷皇子琬事三京用師廷臣邊聞交進機會之說味道進議狀以為開邊寢濶應援倍難洛師尋以敗聞人謂見微慮遠遷秘書著作佐郎卒所著四書說大學講義義祭法宗廟郊社外傳經筵口奏故事議義萬厯溫州府志景定間謚文修

周端朝

傳詳名臣

陳埴

嘉靖浙江通志字器之永嘉人從朱子於武夷所見超卓紹定間趙善湘建明道書院辟主講

席四方學者從游數百人稱為潛室先生埴舉進士以通直郎致仕著有禹貢辨洪範解王制章句

木鐘集

林武

萬厯温州府志字景文永嘉人孝友冲約博通經史朱熹講道武夷武徒步從之受中庸衣錦

之旨歸扁其室曰尚絅輯平日所聞為語錄後以恩科授河池縣尉秩滿廣漕交辟不就歲歉賑及遠過子渭孫知柳州

孫璫夢桂俱登科

包定

永嘉縣志字定之治春秋書禮三經聞晦菴自同安歸奉於家講學白鹿洞相從論道著有中

庸解疑孟子答
問池州語錄

戴相

兩浙名賢錄字文子永嘉人登嘉定第遷秘書郎為湖南安撫叅議官卒相少師水心葉適得

其旨要嘗曰詩壞於衛宏之序春秋誤於公羊之傳易繇於三聖繫又象象之互入書失於孔壁序傳簡編之相亂周禮特周公大約之書當時有未必盡行者識者是之所著有五經說諸子辨論東畧都要

翁巖壽

萬厯温州府志字如山初名夔永嘉人登淳祐第調永州教授以憂歸性行純固師陳埴

盡得微言奧義從學日衆嘗令人讀近思錄曰此讀書之梯級也又令觀言行錄曰此為人之標準也其學以修身勵行為務學者尊為庶善先生

胡子實

萬厯温州府志初名希孟字醇子永嘉人力學不怠於四書所得尤深鄭涂孫尹樂清創

宗晦書院請主教習多士歸之德祐末帶行國子監簿使明州卒著有講義習史管見

元

史伯璿

萬厯温州府志字文璣平陽人幼嗜學強記博通經史及諸子百家之說精究四書深得

朱子之旨時說與朱子背馳者多乃著四書管窺以辨明之又著管窺外編論諸經史天文地理古今制度名物學者傳誦焉人勸之仕則曰讀書本以善身為仕而學豈吾志也遂隱居終身

繆主一

兩浙名賢錄號天隱永嘉人從葉味道游博學強記補國學生通易書禮三經賈似道薦

湖之敗主一與同舍生伏闕上書攻之德祐初以疾告歸隱居教授晚年雙目皆瞽大德間郡守廉

欽定四庫全書

卷一百七十七

希憲延為郡庠經師時初製大成樂禮器祭服制度儀式必諮詢之主一詣練典故記憶不衰與人言疊疊無倦年八十餘卒有易精蘊論學軌範尚書說禮記通考天隱集

章仕堯

萬厯温州府志字時雍平陽人通經史深究四書間奧時方尊顯程朱之學仕堯研精覃

思發明傳意嘗曰時之治亂由於人心之邪正心之邪正由於學術之醇疵識者以為名言蔣允文趙次誠等皆其弟子後進言義理之學必稱仕堯云

陳剛

兩浙名賢錄字公潛平陽人受業胡石塘之門晝夜研索遂通易詩書三經旨要嘗著五經問

難四書通辨渾天儀說歷代官制說禹貢洪範手鈔文章學西京詩賦效魏晉父母皆八十孝養至篤教授弟子堂上之席嘗滿鄉里皆稱曰潛齋先生

明

季應期

東甌集傳字均饒號恥菴又號菌翁瑞安人萬厯温州府志少穎悟受春秋於高則誠既

而得閩閩全書讀之於天道性命之微古今事物之理靡不究嘗曰窮經以致其用反躬以踐其實

不如是讀書奚益洪武中以明經薦未幾告老歸年八十三卒

王淵

兩浙名賢錄字如淵永嘉人景山九世孫通詩書二經洪武三年舉進士以疾告歸淵性急直

毅然以作興後學為己任貧而來學者輒以衣糧資給之所著有詩書題斷蓮塘稿

徐興祖

萬厯温州府志字宗起平陽人受學於史文璣明易詩書三經洪武壬子鄉舉授温州府

學教授以性理之學教導諸生咸尊之曰橫陽先生其門人張文選字士銓永嘉人永樂丙戌進士

選庶吉士著有易經講義四書訓解

葉挺

萬厯溫州府志字允疇永嘉人穎悟絕人聞方祖安徐裕軒得理學於蒼巖師事之遂達性命

之蘊正統間郡以明經薦力辭隱居教授所著有理氣圖說學庸訓詩文遺稿鄉稱尚志先生

王叔果

分省人物考字育德永嘉人嘉靖庚戌進士授兵部職方主事累遷湖廣右叅議擢廣東

按察司副使歸里遂杜門不復出既感脾疾就枕若寐熟者撼之逝矣年七十三著有永嘉志半山藏稿萬厯溫州府志叔果潛修考古無一日去書所常精者六經性理之學嘗輯象山語畧明其非禪取晦翁晚年之論不相二者合為一錄又以陽明先生指心之良知是為聖欲學者惺惺不昧以明乎晝夜之道觀察胡直考功申旌中丞耿定向相與約會論學共推以為得實際云

國朝

史尊朱

鄉賢留祀冊樂清人七歲通孝經十二補弟子員食餼貢成均天性孝友操履端方步趨

先民律度憫俗學不知修己之要立德之本乃作學則圖說并著有孝經刊誤註解讀書淺解及史論太極圖說解與夫發明大學中庸易象詩禮性理等書

處州府

宋

龔原

東都事畧字深父遂昌人舉進士哲宗即位為國子監丞遷太常博士會議秦悼王之後應襲

封者原曰秦王嫡絕立庶自合禮令議夏至親祀北郊原曰合祭非禮也加秘閣校理出為兩浙轉

運判官結聖初名為國子司業改起居舍人以集賢殿修撰知潤州徽宗即位入為秘書監遷給事中出知揚州召為工部侍郎移兵部除寶文閣待制陳瓘彈蔡京原坐與瓘友善落職和州居住起知亳州命下而卒原力學以經術有文集七十卷易傳春秋解論語孟子解各十卷括蒼彙紀嘗謫和州金人竊據其子楫率家僮往襲遂死之

周南

括蒼彙紀字南仲遂昌人壯歲束書游四方建炎初見李易作狀元遂無意仕進受潘子醇忘

筌書以歸其講易由靜極生動乾生於坤因歸其說於坤之六二大抵皆祖忘筌而暗合於歸藏自號知常叟時人稱為知常先生

潘景憲

括蒼彙紀字叔度松陽人以童子中禮部選入太學同呂伯恭擢進士以己學不及遂師

事之因與朱子友善申婚姻之好及卒朱子為撰祭文墓銘謂其躬行之效內則孝弟著於家外則仁義信於友而竟不能隨世俯仰一日致身於仕路云

應恕

台學源流字仁仲號良齋括蒼人朱子嘗以老友呼之其所與論學一論大學中庸一論禮書

一論易本義且云尚恨聞見淺薄望詳賜誨諭勿使有待於後世子雲也雖朱子之謙光咸受亦恕素學有足取重者如此杜清獻云吾鄉故多士而聞義理之淵源實自仁仲始

陳葵

括蒼梁紀字叔向青田人自少篤學至老不倦舉隆興進士知平陽縣居官廉介師事魏益之

因教以盡棄所懷獨立於物之表未久忽大悟洪纖大小高下曲直若有見焉又嘗自言用功益難進道愈遠古人今人皆未可輕議朱子每重其學術士有志者必使往從之曰可以寡過也又與其

子在書曰過青田
不可不見陳叔向

王光祖

括蒼彙紀字文季松陽人官大理評事精於理學朱文公提舉時邂逅邑之福安僧舍文

季拱立規掌如太極狀公異之曰王子胸中自有太極間以傳註質之文季曰公註中庸不使滋長於隱微之中愚意當加潛暗二字公深然之後寄孫竹湖書曰吾到枯止得友王文季一人而已

林椅

兩浙名賢錄字奇卿麗水人登紹熙進士淹貫經術而於周禮尤精以周禮為周公經世之書

凡民極所由立日用之常誠偽之變莫不區別纖悉畢備乃隨類條列之名曰周禮綱目調紹興府

教授時翰林學士樓鑰禮部尚書倪思表其所著進奏除刑工二部架閣

劉炎

括蒼彙紀字子宣松陽人少侍父遜齊先生習開庭訓專事程朱之學因慶元黨籍隱而不仕

從真文忠遊著劉
子邇言十二卷

梁椅

兩浙名賢錄字子奇麗水人登嘉熙進士第早脫場屋遂得潛心講貫力於為文晚年慕程朱之

學編輯遺論名曰論語翼
除太常寺丞權禮部郎官

王道深

崇禎處州府志松陽人隱居力學究極性命之理朱晦菴見之與語大悅又有葉符叔亦

嗜理學嘗請晦菴
書敬齋箴以贈之

尹起莘

明一統志遂昌人隱居不仕學問該洽嘗著資治通鑑綱目發明五十九卷行世括蒼彙

紀字耕道魏了翁稱
其深得文公之意

羊永德

括蒼彙紀縉雲人師呂成公著春秋發微由進士終奉議郎徽州通判子哲師成公之子

欽定四庫全書

浙江通志
卷一百七十七

伯愚問學該博才
思深遠著指南集

葉季韶

崇禎處州府志字承之縉雲人舉進士授臨安教授以疾辭歸執經呂東萊之門明性理

之學吟嘯自適有蘭谷集

詹介

括蒼彙紀字敬父縉雲人朱文公高弟薦於朝官儒林郎總領所幹官學者稱玉澗先生

陳邦衡

括蒼彙紀字伯明縉雲人隱居教授作式鄉邦同弟邦鏰師朱子窮性理之學

項復

崇禎處州府志字吉甫松陽人嘗從慈湖楊先生學一日先生問曰學而時習作如何說復倉

卒無以對但云三日不談口生荆棘先生撫几嘆曰正是此說復由是警悟學業益進晚年有薦之

朝者以白衣授校書郎
隱居不仕自號耕樂

鄭克寬

括蒼彙紀字伯厚遂安人遊松陽類庠就項平甫得聞朱子之學由進士授嚴陵郡博士

積階至朝議

大夫學士

王夢松

括蒼彙紀字曼卿青田人篤志好學隱居不仕著禮記解學者稱為慎齋先生舊浙江通

志夢松嘗曰學以躬行為本徒知無益指孟子四端即舜禹道心之微每於此心萌動處下功夫主敬以存養之師事葉味道造就學者皆有成驗

蔣世珍

崇禎處州府志字君聘縉雲人嘗從陳潛室先生游開慶元年進士官從仕郎歷鎮江建

德温州教授
學者宗之

吳梅

括蒼彙紀字仁伯麗水人師事北山何基教以真實堅苦著四書發揮泰質於魯齊王柏任浦

欽定四庫全書

卷一百七十七

江縣尉後
改錢塘

李致平

括蒼彙紀青田人治詩書易傳
會其要領著精覽歸一圖解

元

鄭滁孫

鄭陶孫

元史本傳滁孫字景歐處州人至
元三十年以薦召授集賢直學士

陞學士乞致仕歸田里所著有
大易法象通贊周易記玩等書
弟陶孫字景潛世祖徵至闕奏
對稱旨授翰林國史院編修官
陞應奉翰林文字出為江西儒學
提舉滁孫兄弟在當時最號博洽
儒學之士翕然推之

樊萬

括蒼彙紀字萬里縉雲人嘗執
經金華王柏之門元初為滁州
教授入為應奉翰林文字終江

浙儒學
提舉

王文煥

括蒼葉紀松陽人一名子敬字叔恭夙承家學取孔孟諸儒緒言研極精微著道學發明

大學發明中庸孟子解及心鏡圖治心銘諸作以心為明鏡毋自欺為藥物畏敬恐懼克復省察為

工夫學者稱
西山先生

李仁壽

括蒼葉紀字山甫龍泉人元末用薦教諭慈溪徵逋祖新禮殿祠黃公震於學宮遷松陽

教諭郡守請定鄉飲酒禮斟酌古今定為儀注陞雙溪山長轉婺州教授不赴治易詩書春秋學者

稱為四經先生著有春谷讀書記易詩書春秋四書行義四書質義詩林鈞元弓治錄遭兵燹鮮存

春谷集
行於世

明

王毅

傳詳忠臣

王廉

崇禎處州府志字希陽麗水人博通五經尤精於易洪武初薦入翰林修史書成授太子說書

官至陝西左布政使所著有交山集迂論史纂南征錄四書詳說又善琴製風木吟書宗韓擇木兼

精篆隸

朱維嘉

括蒼彙紀縉雲人為盧龍丞有政績遷國子助教早從鄱陽朱公遷學有源委為時名儒

著有素履集十卷

葉子奇

兩浙名賢錄字世傑龍泉人至正庚寅以薦試方州中第四人退隱不仕明初浙江行中

書省以學行薦廷試高等授岳州巴陵簿尋致仕卒子奇少穎悟壯游王剛叔門聞理一分殊之旨乃知聖賢之學不貴多聞以靜為主因自號曰靜齋所著有範通元理草木子等書

包瑜

兩浙名賢錄字希賢青田人篤學力行言動皆以聖賢為法由舉人任教諭淮王聞其賢修書

幣聘進講輒稱先生著通鑑事類一百二十卷左傳事類四十卷王命工肖瑜像贊曰見道之真履道之正咳唾古今寤寐賢聖傳獵經蒐回瓢點咏衣冠肅如後學企敬居七年告歸撰述甚多

何燾

兩浙名賢錄字思仁麗水人自志學即毅然以聖賢自期洞究性命大原以鄉薦授新喻教諭

教人務底實用士多成材聘主湖廣鄉試稱得人令信豐以寬仁為理民常見思著有四書集義春秋至意舒嘯東臯篇倉螺錄青桂軒集若干卷

盧璣

兩浙名賢錄字舜用松陽人家貧力學天順甲申進士上疏請正宮闈名分及闡寺煽惑言甚

劉切疏入不報未幾復詆權奸謫戍銅鼓益勵志理學辨論古今未定之說闢元劉謚三教平心論

作貞字補遺十目其圖說深得聖賢之旨孝宗詔起之已卒

黃顯

松蒼景紀字季榮遂昌人博學自淑不樂仕進嘗語人曰為學大要在慎徽五典而已有慎徽

遺稿言多簡要門人私謚為慎徽先生

鄭還

松蒼景紀字復正遂昌人志卓行峻從松陽盧璣學粹然一出於正為文務期實用為曹州訓

導教人忘倦移疾歸談道自樂足未嘗至公府所著有圖學蒙談理氣管見鄉黨須知諸書

浙江通志卷一百七十七